

LT 5464 183 B

~~ChL 5480.2~~

CHINESE-JAPANESE COLLECTION  
C  
HARVARD COLLEGE LIBRARY  
FROM HARVARD YENCHING INSTITUTE

JUN 26 1982

2

2

... 人 ... 刀 ... ...

... 人 ... 刀 ... ...

敬業堂詩集卷三

海寧 查慎行

悔齋



慎旃集下

起辛酉正月  
盡壬戌四月

辛酉元宵月蝕

顧兔乘鸞事總乖  
暗塵誰鬪踏燈鞵  
但期來歲圓還再  
肯照人間缺亦佳  
金筑舊聞荒野史  
玉川奇句抵齊諧  
素娥似有刀環約  
漸放清光入客懷

黔陽蹋燈詞五首

川主廟前喧笑來  
花蠻狡獪學裙釵  
馬鞭攔入北門去  
閒殺新城普定街  
不用彎環竹架棚  
長條宛轉曳紅繩  
月光人影蒙籠裏

一色花籃廿四燈

雄蜂雌蝶擁官衙先後輪番唱采茶忽轉歌頭翻四季  
聲聲齊和牡丹花

龍尾龍頭五丈餘葺鱗鏤甲洗兵初班頭舊出霧官閣  
鼓板中間領木魚

赤脚婢徒鬧掃粧木梳籠髻去隨郎一年一度蘆笙會  
又趕春山跳月場

滇南從軍行八首

漏臥响町接夜郎井蛙穴鼠口尋常開邊使者今頭白  
他日嬰兒號竹王

旨下羊皮督責多前軍追電出牂牁城烏三匝重圍外

聽唱先鋒救勒歌

捷書夜半刺閨還再發西山板楯蠻特賜龍家懸鵲印  
土丞新綴總戎班

金馬關頭毒草春道傍掩鼓不驚塵受降老將幽燕種  
半是當時獻鏡人

三道兵威轉戰餘革囊潛渡計何如肉屏盡向金沙路  
可少姚樞裂帛書

朝家納粟重輸邊卜式才高逐賀遷不是湟中甌脫地  
何勞封事策屯田

天地鴻濛儼再分別傳科斗出奇文就中機密無人識  
惟見飛書入北軍

稱帝稱王意自慙投瓊一咲抵朱三桔槔烽火同兒戲  
兩度燒營到博南

軍中行樂詞十首

旌旗小隊插竿竿簫箏聲中路百盤明日山頭移帳去  
牛毛鵝毳滿兵欄

猩猩貼地坐鋪氈紅點酥油一樣鮮普洱團茶煎百沸  
偏提分賜馬蹄前

斑鹿黃羊左右盃射堂割炙盡羶腴行廚可口烹鮮味  
新淪羹湯進鷓鴣

粵西白獺近來多項鎖金鈴跳碧波鷹犬技窮渾不用  
旌門別唱打魚歌

果下名駒愛水西騎來鬣鬣剪初齊戰場多少洮河種  
骨立秋風向北嘶

臂鞬小鷄覓窠雛密箐深榛近却無駙馬手書馳驛到  
羽毛四出比軍符

仲家苗弩末猶強機轉銅牙怒蹶張楛矢舊曾克武庫  
特煩中使到炎荒

衙頭樵牧占官莊射虎歸來白日藏夜夜橫屍荆棘地  
浪傳車騎出南塘

萬里京華十日通雲邊優詔下軍中錦袍貂帽征南將  
拜賜從誇第一功

五千名籍隸西江乳臭居然擁節幢太尉一軍長不調

擣蒲蹴鞠自雙雙

邸報二首

曾趨絕域拜昆盧降將還朝籍未除博得封侯須好語  
太平天子是文殊  
暴露揚灰罪未伸肯容武庫貯亡新專車長狄僑如骨  
四出猶煩驛騎塵

即事二首

鬻婦粧成細馬馱梨園立部曼聲多太常別有平蠻樂  
不取金釵玉樹歌  
幾處開疆議叙同綠旗歸去亦分功新加細鎧銜都督  
寶頂朱纓隊隊紅

諸葛武侯祠

割據人才出真從運數爭苦心扶季漢餘力到南征廟  
古寒鴉集山高薄雪成渡瀘緣底事錯莫咲書生

自正月以後不得德尹消息用少陵遠懷舍弟  
穎觀等一首六韵

聞汝辭人幕經時少寄書兵戈淹別日梅竹且村居池  
草詩爭秀蠻燈歲逼除兩年期易爽十口計全疎殘雪  
啣雙岫春冰破一渠依依游子夢長自繞林廬

白櫻桃花歌

空庭瘴消風日春櫻桃花頭繁且勻枝南枝北並時放  
初月隔窻浮粉雲梨花無香李太俗別具幽艷存天真

山胡飛來好毛羽字清調熟啼聲頻金鈴風細驚不起  
啄花如妬花含嚔有時一片近人隊酒面掠過香烟熅  
故園開時記寒食年年讌賞遲芳辰依稀為汝評品格  
杏花顏色同鮮新眼前一樹白堆雪開及二月當初旬  
近南已得天氣早雅態更自離紅塵有情相對萬里外  
一醉何必非前因明年花時定誰賞我是今歲吟詩人

得家信

吉禮除喪後悲驩意各真他時憐弱穉此舉慰先人與  
俗寧從儉傳家合稱貧一門婚嫁畢兩姓恰朱陳小姝去夏歸朱季弟今春聘陳

寒食看海棠

不見鞦韆架榆烟火又更轉防花咲客真覺雨無情綺  
句紅紗護微風翠幄迎萬山樵採盡憐汝獨傾城

偶遊東山寺

草長忽無路重來跡已陳寺貧僧乞食臺古佛蒙塵兵  
火殘碑劫鶯花絕域春近南多戰壘愁殺獨游人

檳榔

不愁侵瘴癘開闢得竒功遠客熏顏醉蠻娘論口紅香  
迴金醴液清澈玉川風萬里經相識誰憐庾信同庾子山換

柳詩莫言行萬里曾經相識來

啞酒

蠻酒釣藤名乾糟滿甕城茅此柴輸更薄桐酪較差清暗

露懸壺滴幽泉借竹行殊方生計拙一醉費經營

送彭南陔赴長沙即次留別原韵二首

畫灰竒計決從戎入幕何妨許掾聾鄭俠圖曾傷目擊  
陳琳檄可愈頭風嘉魚有味江東好老馬無群冀北空  
車壁擊殘壺口缺白頭白盡雨聲中

湘中風物近何如太息羅含未定居竹閣語清悲擁髻

芝田春秀夢迴車頻垂旅橐千金散獨泛歸舟一葉虛

劫火不燒周易壞音氣君枕秘發竒書南陔臨行授余河洛易數

三月十五夜夢遊南湖追憶舊好因寄淮江

夢趁歸心得故園鴛湖遊跡宛然存濃烟隔浦浮諸塔  
春樹分行綠一村萬里烽烟遊已勸三年光景向誰論

往來最憶尚書墅柔櫓伊啞直到門

四月十六夜喜雨

天苗小砦破春畊異俗差堪慰客情萬井雲烟扶小閣  
四山雷雨動空城漏侵書榻移難定臥想園廬去未成  
好是綠針浮水候陂塘徹夜有蛙鳴

黔陽即事口號三首

帳有炊烟戍有樓山無林木水無舟王瓜入市家家病  
箐雨經梅日日秋苗婦短裙多赤脚僮僮尺布慣蒙頭  
兵荒滿眼圖誰繪卉服先教遞速郵

土產丹砂及水銀若論肥腴自來貧蠻分烏白皆名鬼  
巖合東西略似人翦葉分鹽沾鳩舌栴榔和血點猩唇



水西小馬新來貴買得偏誇內廐珍  
役夫肩背幾曾停賴尾歌殘忍再聽劫過流亡初著籍  
碑傳德政已鐫銘羊腸鳥道千盤瘴馬背牛皮百鞘釘  
正是西南需餉亟螳螂川路接蜻蜓

恭謁陽明書院

不遣先生成謫宦誰將理學闢荒榛後來事業皆由此  
異俗詩書遂有人複壁只今留絕徼劫灰終古怨亡秦  
講堂亦與兵戈厄馬踏空塔萬瓦塵

送秦望兄東歸

萬里相逢有弟兄羈孤無那送君行雨腥雙袖弓刀血  
風靜諸山草木兵夢裏田園重到眼蠻中兒女自成聲

極南從古無秋雁歸去休輕議子鄉

懷葉鄧林副使播州

重巒疊嶂鎖空壕蜀徼孤城近不毛佛現催晴秋閃閃  
鬼車啼雨暮騷騷宦途載涉應知味鄉夢頻歸可憚勞  
計日江南秋信好黃花酒熟待登高

得都勻汪明府子參書却寄

劔河秋漲轉山鳴桂象天低瘴壓城旅况難辭邊邑苦  
蠻人能愛長官清巖光夜放金蠶蠱兵氣秋荒木箐耕  
此際回頭家萬里可因捧檄慰毛生

送李子受往武陵並簡山學禪師

不是無家等罷官客中即次取粗安江清城郭移帆過

戰定桑麻避地難落日孤鴻迴健翮西風老馬卸征鞍  
鄴侯自具神仙骨燒芋差宜對嬾殘

楊大中丞壽讌詩八十韵

宇宙方多壘英雄必大儒兩朝懸碩望一代應貞符學  
貫天人策才鎔造化爐清名傳四世賦價儷三都暫應  
郎官宿旋棲禁掖梧龍鱗批可畏虎齒探何虞銳氣真  
無敵虛名自不沾在廷推小諫有識服訐謨十載官難  
調三遷秩稍渝納言班漢爵罔命入周書繼領霜臺牙  
重聽柏府烏花驄行盡避赤棒或時須姻婭論權貴歡  
傳溢路衢異時公望合一德舊臣孚再秉金銀管弘開  
貢舉途風流歸吐納文義關榛蕪桃李公門盛茶烟瑣

院晡微猷真藉甚經術故非迂撤帳傳衣鉢臨軒命僕  
夫上情深眷注廷論協都俞鎖鑰西南重 恩榮禮數  
逾雕鞍紅叱撥宮宴玉盤盃朱芾加元老黃金賜內帑  
不應煩侍從直爲寄彤猷赫赫千秋業明明萬里塗三  
旌紛照耀單騎歷崎嶇憶昨初開幕殘疆尚負嶠客塵  
雙短髯時事一長吁深籌蠻調象叢祠鬼托狐蒼茫生  
膽勇警策戒衣縑大義攻鳴鼓先聲算獲俘壇場收老  
將舟楫付烝徒轉粟時方亟屯田計似紆量沙俄積聚  
編戶悉將輸剖斷才無滯沈深意每殊幾時休戰伐隨  
處萃逃逋間道纔通蜀前軍已渡瀘焚巢移渥朴拔穴  
徙於菟及見干戈息從教政化敷時危須震厲地瘠賴

支吾樓爲籌邊築弓因克敵呼經年煩草創即事具規  
模俗陋雖難化苗頑亦可忤羈縻存體統指摘訝睚眦  
發難相如檄留心鄭俠圖御囚仍有禮討罪每矜辜疾  
苦逢人問瘡痍試手扶心銘關感動口惠詎驩娛春雨  
膏曾徧秋風病卒瘞哀憐看賣劍痛切請蠲租澤雁勞  
初集吳牛喘漸蘇陰功多被物憂國細傾壺世儘榮殊  
遇公猶孫碩膚乞歸辭婉委 優詔答勤劬法曜輝南  
極 皇威暢兩隅印金龜轉紐袍錦鶴呈珠側聽中興  
傳誰云往事誣穀城傳指石鈴閣叶懸弧俯仰差無負  
韶華好自愉長生花是桂異域酒名蘆野獵登麋鹿山  
肴進鷓鴣黑頭光黼黻明日艷氍毹仙骨清方貴豪家  
習摠無風華矜少壯顧盼指須臾瘴癘披襟淨烟霞滿  
腹腴西園催刻燭東郭濫吹竽賤子通家舊頻年幕府  
趨孤踪隨泛梗里耳厭皇莠自比依枝鵲誰憐伏櫪駒  
襄陽留叔子夏口滯元瑜鄉思年年共陪遊往往俱禮  
優慚上客才短惜微軀知己能容拙開懷必盡愚但令  
親几烏何用苦牽拘古有輕投筆人今異執爰詩狂容  
杜甫揜狹笑淳于感憤尋常失蹉跎歲月徂受知非泛  
泛述報祗區區醉酒杯長潤啣毫墨未枯平淮碑好在  
未敢憶江湖

九日同赤松上人登黔霧山最高頂四首

絕磴扳躋望已窮忽穿鳥道入禪宮雲端方丈娑羅日

井底孤城簷葉風草木連天人骨白關山滿眼夕陽紅  
興亡何與閒僧事一角枯棊萬劫空

空谷西風晝怒號山寒九月馬歸槽路危怪石驚將墜  
天縱諸峰勢競高羅甸一軍深壁壘滇池千頃沸波濤  
勞人何限登臨意不向糟丘覓二豪

諸將開邊振鼓鼙幾聞京觀築鯨鯢巴賓未脫金牛險  
土貢長聞檉馬嘶事異汝陽休許魯謀新曹沫恐輕齊  
亂山中有豺狼穴凶突何人議水西

渡瀘溝畔闢新阡瘦棘荒苔半石田漸有疎烟生郭外  
那無一雁到天邊蠻方對景憐佳節客路登高感去年  
落帽臺孤風雨暗短裘長路又三千

十月二十二日接德尹長沙第二信驚聞三叔

父訃音旅中爲位而哭悲痛之餘得詩三章

荆南風雨沅南雪幾處追隨意最親乍喜遠遊依骨肉  
却愁別路沮音塵人來絕域原拚命事到傷心每怕真  
兩地存亡身萬里一襟啼血隔江濱

燈花剝落雨沈沈昨夜長沙有訃音薄宦竟虛三徑計  
首丘終負九原心老成頓盡天難問家運中衰勢不禁  
好與精靈扶後起松楸先兆已成陰

臯魚路盡獨悽然此意能生叔父憐豈謂縗麻辭故國  
重將涕泪洒蠻天孤蹤黯澹成千里一信蹉跎到半年  
也擬招魂歸未得瘴鄉誰與慰沈絛

得荆侯姪習安訃信拭泪寫此并寄尊人楷五  
兄二首

手札頻開破旅愁訃音此夕黯然收眼枯倦枕孤燈淚  
天偏哀猿萬壑秋憂患豈知緣識字男兒真悔覓封侯  
一棺難掩平生氣鬼火高于百尺樓

黔雨滇風近十年歸裝臨發尚遷延浮名誤汝今如許  
異域生還洵偶然賸與孤兒留筆硯最憐少妾賣花鈿  
倚閭別繫高堂望旅櫬何時到墓田

老僕東歸寄慰德尹兼示潤木

迢迢萬里途莽莽三歲隔離悰兼旅况雜沓難並釋欲  
寬居者情聊紀獨行跡前年遠辭家荆南事挾策中丞

天下賢謁入容揖客賓徒車服盛中有麻衣雪偏臘踰  
洞庭羽毛風瘳瘳武陵一春住山水愛澄碧尋僧就閒  
暇橫草應煩劇隨師赴辰沅跋涉隣殞城麻陽三挂帆  
銅仁雙著屐前軍舞陽戰破竹勢深入偏臘抵貴陽孤  
城如破驛荒署瓦僅存窻戶悉頽拆移時開敝篋稍稍  
置硯席主人况巨才手自樹英烈蠟丸刺閨至文案日  
幾尺岑范媿幕僚但坐看擘畫邇者西征將繼被中旨  
責已合兩粵師咽喉勢交搯滇城久未下攻守力云竭  
師久必屯田其能懸釜鬲燹僮竄榛莽廢土曠牟麥即  
事常躊躇察省愴捐瘠那無一尊酒排遣就務隙蠻花  
非時開犵鳥亂格磔窮愁託吟咏好語慰行役束縛得

蹉跎年華坐拋擲憶昨初來時針孔冒矢石  
羈縻委亂草霧淞雜凝血馬驚忽騰躍人意一悽切  
亂離民命輕鷄犬等狼籍僕夫掖我前慘慘度軍柵  
回思田園樂歲晏情逾迫功名捷徑啟大府破常格  
我無卜式貲寸進計斗石移文累好友初約背疇昔  
全生爲門戶識者應見惜枵然旅橐垂念爾勤拊家  
門忝居長慙愧少擘擻子言嫂姪貧何忍分涓滴不  
記少小時推梨恥割宅開函見子意至性生感激族  
譜教方哀錙銖起墻闥豈知手足恩具邇異踈逖即  
此慰先靈庶幾免離析草堂父書在千卷皆手澤西  
園梅竹林十畝錯塍陌得錢了公稅餘用佐菽帛讀  
書兼治生生理恒苦窄吾方逐游

惰勉汝終苦說長鬚隨我久嬾惰亦成癖憐渠筋力衰  
遣去情脉脉臨發寫此詩萬山猿叫夕

烏山戰象歌

并序

歲六月前軍轉戰于烏木山陣獲三象遂以捷告驅  
象北行道出貴陽觀者如堵僕爲作歌

烏山轉戰煩驍騎鴉鳴牙中風捲幟南人驅象迎我軍  
鼓未成行氣中潰渠豪力盡投深箐竄鼠奔猿互顛躓  
是時三象屹不動却立如山鼻垂地將軍獲象等獲俘  
陣上懸金募生致須臾拔箭膝行入柱聳圓蹄一十二  
橐駝珠玉壓背裝象也輕身受人制我聞內廐舊成群  
食俸曾援三品例牙花雷雨偶一開何必焚身因挾賄

此行生死隨所置莫更回思戰場利君不見功成則騁  
敗輒降世上男兒盡如是

送人赴黔西

羅甸西游影倍孤亂猿啼入贈行圖邊城事少餘詩興  
幕府花開散酒徒北鴈久遲鄉信到南霜偏著客髯枯  
封侯不是書生事投筆無端笑渡瀘

咏史八首

翻覆興亡閱兩朝老來劉濞氣逾驕十年賓客謀何密  
四海漁鹽利頗饒西貢幾曾歸武庫南琛無復換文貂  
徒薪可少長沙策一擲金甌險得臬

近說孤鷄死首丘特煩獻馘入皇州朝家舊識田橫面

飲器難寬智伯頭視塋敢容雙騎客爭功何與什方侯  
天南從此無征戰上苑昆明罷習流

輓轡綆斷井應枯溢主休傷押不蘆粉麝餘香啣語燕  
珮環新鬼泣啼烏殘粧掩鏡雙蛾短白鼯埋沙尺土無  
別有紅粧連騎入金盤銀燭揀明珠

析骸食肉一城空阿父空提五尺童旅火焚巢何自苦  
齊書飛矢竟誰功大臣未必憐朱瑒故吏寧須問向雄  
滿眼殘黎皆僕妾向來跼縮倚神叢

風急降旗舊折竿播州歸甲極凋殘一時管統援師盡  
同日臧洪赴死難赤手何顏還抱馬白頭無望復登壇  
大斤山下逢隋將猶作燉煌戍卒看

襲美官高並入秦他時聲望起紅巾豈應東市陳尸客  
妄比南唐下第人記室有文慚勸進霸才無識笑輕身  
鴻毛一燎全家盡豫讓橋荒鬼火新

勾漏龍門接壤間謾勞回首望刀環銷沈戰壘金沙澗  
畫斷關河玉斧閒季布敢論亡命去田疇爭許奉書還  
滿堂舊日三千客幾個聞鷄並出關

大廷一意注安危充國金城事不疑滇海有人聞鬼哭  
棘門此外盡兒嬉古來成敗原關數天下英雄大可知  
莫笑書生無眼力與君終局試論碁

黔陽元日喜晴

以下  
壬戌

曙色晴光一片明亂峰銜雪照孤城未吹北笛梅先落

纔及東風柳便輕萬里烟霜迴綠鬢十年兵甲誤蒼生  
眼前可少豐年兆野老多時望太平

楊南城自鄢陵陞任劔川州牧道出黔陽因病  
乞休比方養痾黔霧山寺高其勇退之意作詩  
贈之

如此山深可耐寒髮絲禪榻且盤桓日南郡較中州僻  
天下官惟牧守難世路交情雙鬢換春風歸信一帆安  
君家舊住吳淞岸三泖烟波底樣寬

送友人入蜀

揚鞭倚劔出牂牁鈎棧盤雲幾驛過盜賊烽銷諸郡僻  
英雄祠入亂山多卜居未穩寧論地行路雖難莫放歌



便擬題詩繼夔後此邦風物比如何

水西行

烏蠻遺種稱羅鬼剽悍斷頭能掉尾傳從濟火年代深  
世土居然屬宣慰我從里俗詢大概復取興衰質諸史  
中古荒茫不足論淵源請自先朝始洪武初年禍亂平  
遠畧僭荒來越舊是時奢香一巾幘躍馬金陵謁天子  
承恩歸去立奇功一諾西南九驛通却笑五丁開不到  
亂山高下隔蠶叢二百餘年太平業世世分藩比臣妾  
後來生聚啟規模四十八支互蟠結別開荆莽起臺殿  
硎户硎房高櫛櫛已分王土作王臣旋練夸兵護夸穴  
剝牛磔犬片言重聚蟻屯蜂一呼集布囊籠髮覆覆肩

負弩搃刀輕出沒恭和功烈汾陽亞神廟中年平播賊  
當時亦用水西兵驅使前行借餘力釀成殃禍啟禎朝  
殺吏圍城氣漸驕深宮南顧鞭難及諸將西征功屢邀  
土司如狼吏如鼠八捷餘威棄歸路內莊一夜隕河魁  
明日三軍齊縞素眼中大創真無幾可惜偷安旋就撫  
閣鴉關外曉傳烽靄翠營南夜鳴鼓爾來桑海變須臾  
此輩根株未盡除夸性陸梁還似故朝家謀畧故非疎  
經營特借強藩力辛苦開疆一載餘至今父老猶能說  
墨守輸攻真勁敵老窠地險石作城要隘不容雙騎入  
銅牙毒矢斃濡縷竹柄長矛利鉤棘馬蹄過嶺捷于猱  
革甲環身輕似葉連宵斫陣萬炬明散入深林曉無跡

蛇神盡鬼助饕虐飛食人頭吐人血砦前路斷臨奔壑  
失勢一摧千萬尺四山伐木斲作廂裹用牛皮冒生鐵  
石椒懸絙下槌門雷斧轟天巨靈劈攀藤健兒氣力盡  
拍手蠻娘咲投石重圍坐困又經時轉粟方愁乏良策  
豈知存滅總關天渠首終成戲下懸萬嶺提封開四郡  
一朝腥穢滌千年自此巖疆少蜂虿餘威遠懾諸苗砦  
空留徼外廓清功自蹈人間僭亡罪此日重勞問罪師  
烏飛三匝失棲枝忽傳耐德生還日趙氏中山尚有兒  
烏蒙犄角稱甥舅曾是安坤舊婚媾也挈遺孤代乞哀  
復歸故土希恩宥頗聞軍令競邀驩滿許閒田復見還  
土貢紛紛呈鐵踣庚苴往往賜銀盤寄語封疆諸大吏

從前開闢談何易莫貪扯手納金錢此事孤雛有深意  
輸糧禽賊爾何功王會圖成戎索同不見天心今厭亂  
戰場新鬼盡英雄

中山尼

中山女尼顏似玉布襪青鞋行不白日潛形灌莽中  
逢人不敢吞聲哭自言生長本名家阿父才名宋玉誇  
千里飄飄隨遠宦一家迢遞入三巴養成嬌女嬌無偶  
掌上明珠唾隨口花前侍妾盡知書鏡裏新粧時學母  
自從觀察去朝天官署清涼遂可憐寇盜西南俄阻隔  
慧氛狼鬣掃東川孤兒寡婦皆臣僕翠袖寒羅行補屋  
賣散平頭計漸貧嫁分紅粉身何獨飄零無賴到南遷

夫婿移家遠入滇幾夜新婚成永訣旋收戰骨葬江邊  
早年淪落多關命石上三生眼前證便遣情緣着死灰  
行依心月開圓鏡小鬟何意尚隨身宛轉青絲手共分  
金剪無聲雲委地寶釵有夢燕依人扶攜同向中山寺  
改口人前喚師弟別與繡經起法名慶光舊是閨中婢  
皓齒明眸兩比丘久拚生死等浮漚香燈繡佛前因在  
從此相依擬白頭晨鐘暮鼓流光易荏苒今年三十二  
骨月深恩且勿論滄桑時局關何事何當六詔又屯師  
十月孤城乍解圍將軍奏凱功無敵悍卒搜牢勢不支  
移巢拔穴驅人起但是有身無避理一朝蓄髮強同行  
幾度剗刀猶不死歸程昨夜次徧橋哀角吹殘令寂寥

却喜道傍俄見棄草間跌坐度清宵同行偶傍江東客  
拍點雲山曉來跡雙江暫擬尋同伴半路又驚逢邏卒  
太守呼來淚未乾含啼一一語悲酸亂來莫說爲官好  
兒女姻親那得完夢裏生還愁故里依稀記得萊陽是  
已作昆明劫後人托根何必仍棄梓君不見列帳西來  
珠翠圍忿忿粉鏡去如飛不知皂帽天涯住何似紅裙  
馬上歸

班師行

滇池平滇水清滇南曠蕩餘空城犬無夜吠鷄不鳴將  
軍奉詔初拔營幾姓分旗徧行賞同時帳下添廝養何  
取邊頭戶口繁十年生聚滋奸黨白頭翁媪啼且僵棄

擲不得收戎行翻身一仆委溝壑骨月滿眼紛飄揚紅  
顏如花扶上馬坡高驚踣珊瑚把兒郎新嫁羽林軍山  
下人逢執鞭者近前一隊飛塵起中有傷心泪偷洒朝  
家本意重開邊劇賊初平近十年爾等纍纍皆鬼妾偷  
生敢復祈哀憐即如滇城圍七月未能下戍卒壘頻高  
書生箸誰借君不見禁旅一出西南通煌煌中旨褒  
膚公參軍誇謀士誇勇逢時多少稱英雄綠旗只合就  
裁汰那許尺寸貪天功從此歸成垂白叟賣刀買犢安  
農畝猶及生兒際太平家家相賀持羊酒

和答彭南陔長沙除夕見寄原韵

薄遊依地主歸計幾時成老被妻孥累貧銜故舊情綠

尊消夜淺白髮競春生亂後飄飄跡能無感北征

黔南署中連接與三子穎右朝手書知德尹已  
入燕歸計遂決先馳詩以寄

出門儔侶稀蒼莽七千里豈不念離群徒亂人意耳素  
心十餘輩一散如潑水同源乃殊流所到隨坎止行人  
半萍梗居者僅桑梓所恃氣誼敦尺書屢見慰開械試  
終讀感歎忽中起吾弟賦北征殘冬束行李嚴程霜雪  
惡急往寧得已雙親尚淺土舉念每顛泚幼弱兩三人  
田廬詎堪委我來已天末欲去難遽爾鳥道阻且長戈  
船塞江汜主人荷垂諒告別輒諾唯僮僕亦欣欣行期  
屢屈指到家幸非遠計日及秋尾期子賦同歸開園召



鄉社粉榆隔後塵交情翻借布衣親勒銘事大才難稱  
絕代人稀見始真寶匣異光刀剖玉銅盤高燄燭輝銀  
他時重話西征績慚愧曾充幕下賓

紛紛桃李艷公門駑鈍如余尚服轅明鏡何私顏欲換  
清談無用蝨空捫人來江左名慚項詩和春陵格紀元  
束縛倘酬知己分敢隨流俗說啣恩

### 高寨

綠蕨荒無際黃茅直到天祇因鄉路遠猶自惱啼鶻

### 度雲頂關

目極雲生處到來雲滿身時清存畏路興盡有歸人馬  
力疲堪惜禽言聽似真往來經戰地白日起陰燐

### 將至清平縣馬上作

石秀山漸佳城荒日將暮遙見孤烟生猶知有人住

### 晚宿龍里縣署

官舍周圍帶土墻盆池新漲接方塘歸人已夢田廬好  
只道蛙聲是水鄉

### 母豬洞觀瀑

蠻中六月交山路苦焚爇臥聞夜雨來快起尋乳穴入  
洞微有聲足底響嗚咽出山忽震怒閃睽不容掣巖前  
匯奔流人駭馬辟易來如曳組練一綫注飛白跌為淵  
潭深湛湛落澄碧石牙互參錯吞吐霹靂舌直從灣濶  
底跳沫騰百尺慘慘天變容凜凜風作雪岡頭杜宇叫

萬竹劃然裂將歸得奇觀頓解肺肝渴

冷溪

溪渾三尺雨馬渡一汀烟徑轉長防虎沙平忽有田斷  
雲依岫險亂草得花妍滿眼悲涼意新詩記不全

平越遇雷玉衡索留別之句口占贈之

依舊青衫把一鞭紛紛白面看談邊冷官未了從軍志  
歧路猶餘話別緣急雨淋浪茅店外亂山高下馬蹄前  
得歸吾已無餘恨只欠游蹤未到滇雷滇人也

黎峨城北福泉山張三丰禮斗亭尚存

清池照影樹扶疎亭前有浴仙池長生桂晝靜廊空想步虛閱世  
人來棋散後出山雲澹雨晴初窮塵滾滾孤亭在浩劫

茫茫百戰餘華表鶴歸應有泪舊時城郭半丘墟

題興隆衛聖母閣

隔斷荒城別一丘蟬聲寂歷鳥鈎輶忽來風雨疑無暑  
如此林巒合有樓塵刹留僧還築奕瘴鄉有路莫回頭  
澹忘未必同靈運直為清暉作少留

寓樓晚坐

一聲清磬出柴關庵主軍持乞米還暝色群群栖樹鳥  
夕陽朶朶隔城山

偏橋田家行

結茅住山顛種田在山麓田荒費牛力僅得播種穀七  
年際離亂饑饉死相屬稍思歲一稔生命絲或續師旅

比凱旋驕嘶百萬足黔山無水草何以充首着成群走  
阡陌泥淖沒馬腹食葉躡其根螟螣等荼毒秣芻一朝  
盡婦子終歲天下自昇平民生有踏踞我為老農語  
物理視反覆來年期好收重看秧田綠

晚登偏橋玄都觀後閣

承平推舊鎮設險控西南水勢全趨楚山形尚帶黔壤  
城平似掌古觀廢成庵即事多興廢兵戈實厭談

重宿澠陽中山寺贈紫橋長老

水色山光淨眼前下臨無地有蒼烟長虹自亘西來路  
峭壁剛支北面天開士偶逢堪一笑舊游重到已經年  
亂離風景勞生夢可少秋堂借榻眠

舟發沙灣入沅州境

烟村紅日吐初晴野泊舸艚促早程秋水澄鮮魚味美  
曉山葱蒨鳥言清城連槃瓠形猶壯灘過鸕鷀怒未平  
我是沅南留滯客舊游一一總關情

天星灘

明星的的吐飛湍石勢參差亂眼看莫擬乘槎到天外  
偶從竒險博竒觀

神堂灣村家

布裙翩翩短幅高髻亭亭古粧望看人成翁媪不知世  
有姬姜

辰溪縣晚泊



夕陽孤塔表辰溪江面初寬地漸低從此一舟平似掌  
萬峰回首夜郎西

瀘溪

傍穴纍纍架樹梢懸崖百丈俯江坳小舟恰傍山根過  
長恐風狂隴鳥巢

兩頭纖纖曲二首

兩頭纖纖舫子船送郎只到洞庭邊四時雪浪灘前石  
白日雷霆枕底天

兩頭纖纖月上弦中秋屈指又今年歸路二三千里近  
別家四十一回圓

晚過界亭

晚景融怡剪渡還見鷺隨我過前灣半江風色參差浪  
臥聽猿啼夾岸山

桃源訪胡孔志不值

漢陽分袂已多年聞說遊蹤久入燕歸路我經秦客峒  
故人貧就廣文壇棗麻舊俗今誰主昔藉荒齋醉少緣  
秋雨暮帆惆悵在可堪回首洞庭烟

沅江縣治濱湖居民皆漁戶水盛時舉家乘舟  
入湖秋冬水縮則結茅沿岸住

官舍無城傍水濱鵲鵝鴨半居民疎燈幾點夜呼渡  
老屋百家秋結隣岸曲蘆深長響雨船頭魚健欲驚人  
饒他小縣輸漁課賦斂湖湘俗久貧

將之長沙留別沈將雲

武陵溪口手重揮獨向長沙未得歸憑寄家書傳客況  
為言弱羽又分飛

青草湖

森森湖光天盡頭矇矓初日起蘆洲小船百折行難到  
一片蒼雲白露秋

長沙舟次聞德尹入黔之信二首

去年此地君思我君到黔中我又歸世路茫茫誰料得  
離人黯黯意多違兩萍湖海原難遇獨雁瀟湘正嬾飛  
此夜夢回姜被冷殘燭疎雨倍依依

岐路匆匆過朗州

弟去常德纔五日而余至

菊花初約誤林丘音塵

京國書遲達詩草炎荒客善愁道路半年成萬里

德尹于正

月自故鄉入都今又來黔故云

江湖一信到孤舟跼浪泊來何為歸

去吾方羨少游

長沙喜遇彭南陔

鷺立蘆花淺水蠅肥稻壟新霜夢去故鄉秋好一尊閒  
話瀟湘

長沙雜感四首

水遠山平極望賒湖南風物一長嗟屈原已去終亡國  
吳芮如存可世家湘竹舊痕啼夢雨薜蘿新鬼怨囊沙  
孤城自繞殘陽岸風急秋清急暮笳

觴角關山百戰過征南精銳竟如何牛羊隊逐移營盡

犀兕人傳棄甲多蜀虎連年勞悵望黔驢無技任譏訶  
孟明一青功無敵別路今聽唱凱歌

窮年供億奈兵荒穀賤傷農力莫償地遠舟車還絡繹  
時清圖繪有流亡勞魚未必忘煦沫集鴈何當穩稻梁  
十萬人家君勿問如今瘠土是三湘

早濕南遷事可哀鬼神宣室召空回君臣如此猶嗟命  
絳灌何人乃忌才史漢高文光照耀江山故宅客徘徊  
治安敢擬長沙策直為先生痛哭來

同南陔九畹遊嶽麓中途遇雨興盡而返

緡帙曾披北海碑南游雅與素心期好奇歷險人皆笑  
冒雨尋山興又癡雙屐泥痕苔剝落一江帆影浪參差

衡山咫尺猶難到敢望雲開似退之

八月十四夜洞庭舟中風雨再寄德尹黔南

扁舟小泊最蒼涼那更回頭望夜郎浪跡久經烟瘴地  
懷人今在水雲鄉燈紅極浦秋何際月黑寥天夜有光  
滿眼江湖飛不到始憐羽短道途長

洞庭阻風歌

湘陰去岳陽湖面一日程雲從北來風色惡吾力敢與  
吾命爭船頭紙錢撒白雨舟子酬神致私語老鴉啄肉  
掠水飛廟祝鳴鐘月東吐大哉神靈本至公憑私詎可  
祈感通不如繫船整篷索南北東西預難度明朝風便  
從爾行莫使有風帆力弱

中秋夜洞庭對月歌

長風霾雲莽千里雲氣蓬蓬天冒水風收雲散波乍平  
倒轉青天作湖底初看落日沈波紅素月欲升天斂容  
舟人回首盡東望吞吐故在馮夸宮須臾忽自波心上  
鏡面橫開十餘丈月光浸水水浸天一派空明互迴盪  
此時驪龍潛鼉深目炫不得銜珠吟巨魚無知作騰蹕  
鱗甲一動千黃金人間此境知難必快意翻從偶然得  
遙聞漁父唱歌來始覺中秋是今夕

湘江舟晚

清湘清徹底人影淨征衫秋水漸歸泐遠舟惟見帆荒  
洲無雁到落日被龍銜一樣天邊月今宵迥不凡

岳州

湖腹平吞爾許貪湖唇一噴勢難拮力爭全楚功誰氣  
識應孤城戶已三客夢堠長還堠短夕陽山北又山南  
太平設險非無意漁獵丸泥敢尚探

湖中盜賊  
充斥故云

赤壁

一戰三分定英雄洵有神古今才不偶天地局長新故  
壘秋吹角荒江晚問津祭風臺下路惆悵是歸人

夜宿簞洲驛

洞庭晨出險小驛宿兼程漁火遠村沒雁沙殘月明荏  
苒荒大澤賦斂窘餘生不敢論時事乾坤及罷兵

過湖口作

楚水吳烟一覽收  
新移鎖鑰控中流  
誰興棄孔緡錢利  
盡算江湖大小舟  
山脚酒旗孤店晚  
縣南風色亂帆秋  
詩囊壓擔琴扶膝  
關吏何妨咲薄游

登蕪湖浮圖

落帽家山記幾巡  
弟兄南北各傷神  
茱萸明日重陽酒

五處登高各一人

時家次谷在粵荆州在燕德尹在黔惟韜荒家居故云

木末亭謁方文正景忠烈兩公祠

一姓興亡際  
忠臣尚力爭  
百年公論定  
兩字易名成  
山雨晴蒸氣  
江雷怒作聲  
君看南渡後  
降表出書生

發儀真

綠楊城郭碧蘿洲  
夾岸紅燈映酒樓  
爲愛吳船聽軟語

買帆連夜下真州

欲登金山不果

也有登山興  
中流去不多  
眼中江路盡  
翻覺畏風波

梁溪秋晚

繞郭林塘淨  
晚烟放閒黃犢  
水平田吳霜未剪  
江南綠猶有菱歌動  
敏舫

初到家得陳六謙書并見寄詩二章期余作北

遊馳聲以報

睽違不在久  
依依念儔侶  
與子惜分陰  
矧乃遞寒暑  
六年五寄書  
故人在肺腑  
才華我何有  
藻賞終見許  
久要期勿負  
感子心獨苦  
師門一回首  
過眼如風雨  
初約貧

漸渝旁觀惜毛羽青衫行謁選此意吾諒汝昂藏七尺  
 軀行與衰老伍忿忿簿領下英氣恐少沮并州地苦寒  
 臘盡雪片舞寒驢數十驛遠宦等羈旅此邦經五季地  
 險全用武連延二千年往往警鞞鼓海內今連兵閩粵  
 接秦楚河東耕鑿安天道合存撫安邑古帝墟唐俗仍  
 樸魯官清資俸薄折東到鄉土也擬上羊腸得君作賢  
 主

哭王右朝四首

還家約略中秋後長路風波恨稍遲六日不詹君尚望  
 三年重到我成悲魂來蘋末蛟龍駭泪殺燈花枕席知  
 恠得吳江催噩夢喚迴孤帳雨飄絲九月十二夜舟泊吳江夢中忽有人

大呼曰三日內汝當有奇禍一時驚寤明日到家遂聞兄重陽訃信

卅載交親氣誼中益棺事了太匆匆擬從頽俗存家法  
 不願諸甥有舅風水雪一枝憐抱鵲圖書四壁哽秋蟲  
 東山便是西州路欲學羊曇計轉窮

勿論死別與生離存歿心傷無盡期鮑叔有情貧敢諱  
 尚平多累出偏遲向來語笑猶堪憶從此肝腸好付誰  
 海角天南諸弟散訃音欲寄苦差池

未改頭銜屬望虛手題丹旆又躊躇携來萬里千行泪  
 檢得三年五度書余出門以後好事誰還評月日餘生

吾久負居諸文壇詩社飛揚氣百念俱灰一慟餘

除夕與潤木分韻二首

曾為茆堂乞少資不成覓地向西枝弟兄蹤跡團團少  
兒女心情拍顧移扣角騎牛聊復爾設置守夷定何為  
升沈此際知誰是欲悔身謀又自疑  
燈花檐雨夜沈沈懌我淪飄得故林久別翻驚相對影  
急裝誰諒倦游心時清壯士才難盡俗薄貧交望苦深  
稍喜來年春帶閨未應相對廢聯吟

不見外舅陸射山先生屈指六年今春奉謁里

門旋有吳行兼以送別二首

以下癸亥作

鬢霜髯雪走天涯拂袖歸來記歲華海內詩文無手敵  
座中筋力許誰誇談深世態多經眼老喜遊踪漸近家  
五柳有情難繫別勿論鄉思米囊花

亂餘三徑長蓬蒿粟里田荒尚屬陶逸興人扶雙屐健  
名山天靳一星高春濃遠市紅燈月烟泛輕帆白鷺濤  
恠底尊前還戀戀六年書疏阻江臯

重過聽鶯齋與徐淮江話舊

風雨高齋別幾春小池佳樹碧添鱗兩湖地主憐君在  
三月鶯花笑客頻夢裏何曾忘對榻畫中只合著閒人  
倦游莫訝歸心切知己無如穉子真

三月晦日陳元亮家看海棠

一番陰雨花期盡難得君家尚有春路隔西川無好句  
眼明南郭又芳辰濃雲薄霧憐香意翠袖紅紗絕代人  
還有掛帆惆悵在滿湖烟水夢何因

與顯武別有約而未遂故云

傳經堂歌卓次厚屬賦

後生學術無授受往往談天哆衍口春華秋實古難兼  
氣節文章誰不朽塘西卓氏本望族遜國名臣侍郎後  
天教一姓留典型幾輩蟬聯起諸叟西京篋衍探源委  
北宋儒林辨誰其煌煌藜火燃太乙種種琅函發大酉  
雕龍餘技矢穿楊石鼓舊文魚貫柳一經三世屬名家  
兩字千秋推作手頗聞名儒後必大賢嗣文孫洵非偶  
百年榱桷尚如新別築祠堂寬十畝已看歌頌美輪奐  
更蒔花竹貽長久藏經閣閱曉繙書族譜亭成夜呼酒  
才名後先滿南國不比虛名拍箕斗余家盈盈隔帶水  
累世交情誼稱厚三十年前枯苑分家運迤邐遘陽九

鄴籤兵火蕩餘劫陶逕柴桑慚世守老成頓盡人所嘆  
小子無承良自醜竭來塵壒逐游惰筆墨祇用供奔走  
祖父遺書讀未成冑堂冑構夫何有詩成對君三太息  
獨抱殘經莽回首

同淮江登東湖弄珠樓

但令興到便移船我得同游亦偶然疎磬晚潮孤影墮  
暖雲濃樹四垂天稱心圖畫憑欄外經眼亭臺落照前  
却笑詩成無傑句驪龍依舊抱珠眠

過吳漢槎禾城寓樓

快事相看一笑真忽傳絕域有歸人劫灰已掃文星燦  
黨禁初寬士氣伸佳客偶逢如有約

時陳寄齋俞盛名  
大文俱在座



長恐見無因廿年冰雪思鄉夢纔向田園過一春漢槎

燕家入

吳門喜晤梁藥亭

僕家海東君海南海道相距三千三有時憶君發遐想  
直欲芒屨遊瓊儋故人謂魏禹平金閭傳好語知是久客猶  
停驂買帆兩日風色順百花洲外波潭潭風塵在顏刺  
銜袖咲口一豁心俱甘披襟更覺有深致黃鬚綠鬢垂  
鬢鬢名言霏微齒牙潔絕勝香味飄迦楠小儒窘步不  
踰閫訓詁馴繞如衣蟬讀書已破十萬卷可使蹤跡無  
窮探吳中此來凡兩度一一紗壁留精藍山塘四月天  
氣好輕衫拂領來晴嵐家家綠陰轉黃鳥曷不載酒携

雙柑閉門却掃吟獨苦郢雪屬和何人堪平生美好百  
不入正坐好古成竒貪知君力欲追正始三唐兩宋須  
互參皮毛洗盡血性在願及有志深劇勘拙詩與君不  
同調小言未可誇詹詹數篇見賞自京洛君愈降氣余  
彌慚匆匆人事促輕別欲去暫止嘆清談紅綿花開鷓  
鴒叫歸夢定繞枕柳庵

聲山姪自都下歸相見閭門舟次出荊州兄手  
札期余北遊戲作一詩以答

春冰一騎蹴滹沱柳色蘇臺握手過鹵莽不須慚計拙  
驅馳真欲悔才多吟紅日晏誰同調變徵聲移急和歌  
每遇南轅頻問訊長安米價近如何

同祝豹臣及家西母叔飲韜荒兄齋

高樹柴門景又遷小堂南北綠遮天偶然不速來三客  
如此相思閱五年居近人應疑卜晝路難吾轉愛歸田  
棟花風急村橋暮欲散閒愁仗酒顛

養蠶行

去年收絲利倍三村中家家貪養蠶蠶多桑少葉騰貴  
千錢一筐賣未甘溫風吹蠶蠶易老滿箔三眠上山早  
蠶娘一月不梳頭懶惰却輸辛苦好東家採得繭如脂  
縲向檐前索索吹西家繭頭薄於紙一樣蠶來兩樣絲  
將絲換錢索官串無者價昂有者賤貧家衣食天所慳  
別許居奇營巧宦即今閩海尚與師爭利人人學賈兒

聞道樓船皆市舶買絲豈必盡虫虫

變無秋行

三春雨多二變荒鬱卷盡菱田中央大變莖長穗未起  
小變莖短葉早黃棟花風過縲車傍憶得年時變上塲  
塲乾日烈聲拍拍打變作糜湯餅香腰鎌往刈纔盈尺  
雉尾離襪藏不得驚人角角渡水鳴別向原頭草間活  
可憐鴉鵲不知時群下荒疇覓餘粒我為老農語鴉鵲  
明年好收從爾食明年好收理則那只愁無種將奈何  
西園書屋順治丙戌燬於火瓦礫之塲長養茨  
棘垂四十年比方有事於墾闢既惜地力且以  
習僮僕之勤焉用東坡七首韻與潤木同作

池亭剩曩其長養藜與蒿中更四十載未盡荏刺勞貧  
家供賦歛尺寸無所逃焉能守石田鬱鬱希陰膏益利  
興由人棄捐成不毛旬來拾瓦礫積比頽垣高

赤日薰我顏白汗沾我背鉏荒如去病快得三年艾伊  
昔締構初春秋想高會滄桑變時局草土少完塊誰歌  
蟋蟀詩蹶蹶職思外南山方朝隳厥象占蔚蒼百年雖  
莫保三徑幸猶在給口荼蓼閒其甘等炙膾

生涯失習勞貴賤誰比數優游不堪事尚記前賢語主  
人既率先僮僕趾齊舉給餐稱勤惰功力積毫縷種豆  
畦橫從種瓜架支柱所憂歲將旱六月竟無雨澮畝一  
歉收何由載筐筥力惡不出身貨惡不出土尚恐機事

牽高人未全許

陶家有田園三徑忍就荒籬落缺粗補東西互相望叢  
牙覆塊生一片蒼雲蒼地力久不効新萌必繁昌未飽  
啄粟虜先防踏蔬羊望腹聊忍饑先疇胡敢忘

土性既有宜人情亦有適養材待椅桐孰若樹榛栗移  
根尋丈內本向鄰家乞落實庶可期拙謀作乃逸舉羸  
力不逮何敢議築室灌園豈無人戢影勿輕出此中足  
生事吾計今已必

惡木次第除丁丁響斤斲析薪祈克荷生子願愚慙我

貧天所憐田舍免風雹

用北史王蒙傳事

隨爺課晨夕老圃庶

可學先公垂訓在遠蹟企商嶽黽勉奉前編偏傍敢駁

犖勿言世業盡五畝澤已渥兄弟且同居相容在蝸角

用庾信小園賦中語

仲子性好遊旅食辭南村叔子嬾甘寢鼻息鳴西垣我

介兩者間奇士羞王孫有時事游惰挾瑟隨雍門有時

賦歸來及見松菊存行者咏陟岡居者勸加殮營身各

有役出處且勿論若較杜樊川季强慚令昆杜牧望故園賦云昆

今季强兮鄉黨附

題朱子蓉六丈所藏張穆畫馬用黃山谷韻

綠楊風起驕不行低頭嚼環如有聲乾坤一線塵縱橫  
肉中帶骨筆力透不比東郊詩咏瘦苦憶尋常棧間豆  
青絲漫絡高家驄龍眠妙手亦老翁誰能更貌桃花紅

送唐殿宣之浦江學博任

琴書壓擔曉風清別路山行復澗行青髻功名秦博士  
白頭經義魯諸生月泉詩好篇篇秀寶掌峰奇面面晴  
勿對空枰嗟首菑如今驥足是初程

同韜荒兄飲鄭春薦齋

雲巖醉別忽經春重向吳山問主人陶侃登堂還拜母  
茅容為具也留賓迴風却扇渾無暑急雨催詩若有神  
鸚鵡莫誇才子賦鄭家名擅鷓鴣新坐側有鸚鵡故戲及之

七夕同鶴江孝績序仔集淮江聽鶯齋

紅蓼蒼葭水一方到門松桂已迎涼燈前岐路天南北

時鶴江初從山右歸屋角雙星夜短長雅集幾回逢好

友離悰多半話他鄉當筵有客傷存歿不忍臨風發酒

狂思右朝也

次谷兄自粵西扶先伯父櫬歸里二首

萬里行何畏歸來始泣然亂離成子孝危苦得天憐  
盡干戈外魂驚瘴癘邊路難經死地初不計生還

自古蒼梧道征人半舁棺獠啼赤子父老賙清官竟  
返天南魄翻疑夢裏看附書吾久望執手雜悲驩

彭南陔長沙寄書知其長郎越千已於去冬物

故一詩當哭兼以相慰

鵬賦長沙痛未窮短書緘泪寄西風隔年別酒征衣爛  
幾日歸帆旅櫬同善病我曾憐久客未亡人又累衰翁

畏途盡室成何事頭白君應悔斷蓬

雨中過董靜思山居

十里沿洄暮靄昏熟衣天氣半清溫菰蒲響雨烟沈浦  
蘆荻迴船水到門躍網忽驚魚尾健墜簷初見橘頭繁  
好山偏阻登高屐笑指郎家半日村

題陳允文圮橋授書圖小影

戰鬪功輸運籌亞英雄勇退神仙舍誰招四皓出商山  
我信留侯本儒者竒謨秘策乃天授老父一編事聊假  
不然韜畧世所知豈必傳從圮橋下陳生爾意非好竒  
那將此景供圖寫志大何妨學賢聖時清未許談王霸  
披圖商畧意何如傳習師門計有餘

余與允文俱出姚江先生之門

前經術皆經濟莫問人間未見書

同人中秋集陳寄齋宅

南游我昨逢佳節兩度中秋瘴如墨去年對酒洞庭湖  
萬頃平波鋪練雪電光一瞬等閒過倏忽還家又今夕  
良朋折柬邀共醉憐我匆匆復行色晚來微雨過城西  
影落人衣月東出明河一洗秋容淨海氣天光較然劃  
街頭無人市聲斂相國門前月尤白門前看月堂上歌  
白月紅燈互相射繡屏屈膝圍嬌面赴節紅牙夜深拍  
沈沈簫管索索絲微動梁塵隨猶澁清商一線徐引去  
桂樹流颼葉初脫此時中庭月停午窈窕穿簾巧相覓  
須臾腰鼓忽勾闌假面西涼群嘖嘖歡場冷落年數久

對此翻令感蕭瑟却憶江湖載酒時蘆花深岸聞吹笛  
故人顏色就歸夢羽短途長莽飛越此來會合殆天幸  
竿木逢場看跳擲徵歌自笑膽氣粗起舞偏驚耳輪熱  
東南盤敦君眼見供帳如雲掃無迹獨留好景付我曹  
莫向瑤臺話塵陌只愁客散月易斜人事蒼茫難料得  
來年作客知何地此地來年名何客南枝樓鵲催五更  
東野寒蛩號四壁殷勤酌月還一杯珍重清光照離別

過曹希文齋

恠底移家忽入城小堂幽事頗關情琴牀近海潮添潤  
茶榻分泉火就烹摩詰園亭依畫橐建安人物入詩評  
也知習嬾便支戶不廢堦除有送迎

有感戲寄韜荒兄

格新曾被老元偷此外何堪說唱詠但到西園應秉燭  
不逢東野肯低頭故交牛耳成孤憤棄婦蛾眉托四愁  
拍一博得美人開口笑暫時跛足也風流兄以酒後傷  
邑子

去夏余自黔東下與德尹相左於辰沅道中今

德尹嶺外將歸余又有西江之役二詩留寄

薄遊踪跡久沈吟準擬歸飛息故林別去無端隨末俗

窮來何事愜初心書籤日過塵窺隙茶竈風迴響和琴

一笑飄然仍作客竹窻閒殺是清陰

二頃田知戀洛陽眼中岐路等亡羊江風海雨愁頻結

桂樹荆花感又長草草歸程雙爪跡勞勞別夢五星霜

惟來出入如相避鄉國何時鴈作行

留別朱日觀祝豹臣朱與三陳寄齋王南屏家

西莓叔韜荒兄看山姪二首

綠髻西風幾遍吹許巢貧過少年時用方干詩中語好官氣色

車裘壯獨客心情故舊疑近月江雲偏綯采未霜淮柳

尚搖絲名場此日誰高步消得樊川贈別詩

渭城歌酒氣纏綿存歿關心一黯然落日故人長笛賦

右朝及已一年曉星同調斷鴻天夢回露白移橙候路入秋紅

剝棗邊任是登高何地好青帘那不憶羊川

西江集起癸亥十月止甲子三月

萬里歸來繼逢儉歲家憲副伯方攝西江臬篆邀

荷言堂詩集卷四  
余入署自冬涉春周旋六閱月爲治遊學之裝到  
家五日北行不欲浮沈鄉曲傷長者之惠也

將有南昌之行示兒建

我年二十九足不出鄉閭南舟阻錢塘北轅限姑胥循  
循守矩矱尺寸敢少渝汝祖見背日戊午暮春初銜恤  
在終天有生不如無實擬奉成訓終身依墓廬黽勉同  
汝叔食蒿甘薺如此意難自保饑寒旋相驅初心忽中  
變末俗誰諒余麻鞋走從軍凶服尚未除自傷越禮教  
臨去還躊躇汝時年十二戀戀來牽袂汝母病在牀強  
起縫衣襦爲我擇吉日勸我姑徐徐山林忍窮餓此事  
古有諸奈何逐浪遊浪游計終迂我雖口不答含意鬱

未攄恐喪丈夫勇一笑起跨驢寇盜滿西南殺人棄土  
首書生爾何恃急往不暫須輕命踏危疆鹵莽拚羈孤  
雖無司馬才肯戀終軍繻近避關西公憐才等璠璵留  
我置幕府開誠使懷抒初來荊州城漸入西南隅蹉跎  
戰爭地四載過隙駒憶自前年冬洞庭上雙魚吾叔又  
捐館訃音傳豈虛蠻燈黯淡花相對慘不舒天低嘯哀  
猿月黑號訓狐開書忍再讀百感併集枯上念兩先靈  
窀穸未歸居下念汝曹長失學猶從渠告歸策始決寧  
獨懷樵漁中丞知我真贈言借吹噓坐覺瘴癘掃清風  
拂長途檢點篋中裝白金頗有餘束書盡行李觸熱我  
僕痛故人灑陽守開館留籃輿不惜分俸錢寄歸樹妻



拏命窮氣方傲却去同揮鋤行行百餘日始得還菰蘆  
夜半叩柴扉犬吠雞群呼門前五株樹綠槐間黃榆亂  
葉落我前忽驚秋又徂入門拜靈几血淚交模糊舉頭  
汝在旁依稀記形模汝弟急欲見喚起髮未梳見爺不  
識面反走牽娘裾對之重泗涕存沒傷心俱別離經喪  
亂泛若浮海覓得歸特天憐未歸敢自圖稍欣世業在  
斷蓬復依株繞屋十畝園桑下可種蔬即此勤學圃貧  
士有故吾都緣懶惰久力不任菑畬室人免交適官稅  
多積逋倦羽又辭巢飄飄係洪都仲氏久去家南北音  
塵疎季子資性矯青氈誤爲儒齷齪小兒曹欸段下澤  
車蟲蝦恣跳躍蝸涎活停瀦翻咲尺水艱蛟龍困泥塗

男兒誇富有豈在堆倉庾願汝勤孝弟餘事到讀書孝  
弟乃本根根完花葉敷章句粗能通已勝耕田夫煌煌  
京兆後子孫雜賢愚五世澤未斬有生夫豈徒不聞王  
僧虔鳳凰綴蠟珠崢嶸覘頭角少小志本殊十五號成  
童何況十六與當時同隊者轉眼分龍豬脊母學汝父  
風塵厭微軀厲人恐似已取火夜看雛悔心用自警作  
詩焉敢誣

輓呂晚村徵君

屠龍餘技到雕蟲賣藝文成事事工晚就人誰推入室  
蚤哀君自合稱翁才今漸少衣冠外名果難逃出處中  
身後有書休論價也應少作愧揚雄

黃晦木先生從魏青城憲副乞買山資將卜居  
河渚有詩十章志喜邀余同作欣然次韻亦如  
先生之數

黃竹先生今夏黃自離商嶽走踉蹌青錢易長苔莓路  
畫藁頻移薜荔墻未就丹砂顏屢換欲尋白社願難償  
身經開寶流離後那問西川舊草堂

覆巢事過儼他生回首風波噩夢驚碩果兩朝誰鬥健  
白頭一意自孤行縱橫鈎黨清流禍峭舊風期月日評  
幾爲借柯憐病鶴羽毛如雪照人明

力圃雖艱勝力耘多時吟嶠望停雲未完婚嫁何多累  
投老關河正失群菜把恩羞叨地主薦章名幸脫徵君

故人高義傾頽俗薄俸能爲卜築分

方丈蓬萊事不經收心風物到園亭紅蕖艷後蟬遺蛻  
黃菊開時鴈拂翎感遇詩還工屬對垂簾卜屢驗奇零  
少微越國真高士移向吳天只一星

松木場遙路向西人言罨畫似西溪雨中綠樹雞豚柵  
霜後黃雲秔秫畦琴筑鏗鏘聲落澗風花高下踏成蹊  
憑君指點神先王可待游人爲品題

數折溪橋兩版門也須插槿植籬樊間携翠竹紅藤杖  
晴晒牛衣犢鼻禪耕讀新功兒解課漁樵故事客能援  
名香老研隨身具目擊誰知道亦存

樂事從來出苦辛錯將勞尾比枯鱗眼空身世殘碁劫

日漏軒牕過隙塵方外衣冠驚俗客夢中墳墓抵歸人  
碧幢紅堵村村徧肯咲繁華不稱貧

釣臺何必盡桐江林下人來拜老龐隱几湖山歸四壁  
捲簾風雨到西牕花源舊隱今何代白鶴新居即此邦

已約隣翁勤斬竹與排蟹蝦打魚橋  
一痕龜墨食江郊從此深居遠市朝椰子冠從方士借

筍皮鞵赴老僧招定巢屋角晨依鵲挾彈林端夜逐鴉  
馬跡車輪何處覓遁仙名籍在丹霄

槃澗時清且寤歌欠伸光景底消磨年豐米穀登場賤  
水濶魚蝦漏網多勿藥肯教眠食減不祥端賴鬼神呵  
鷄豚預有登堂約慰我歸來興若何

武林哭萬充宗二首

武功十葉變儒風理學君家創甬東謂尊甫履安先生勳爵初

除綠國破饑寒不出勝途窮傳家同異叅三禮君所著禮

質疑絕筆春秋闕兩公近註春秋惟定哀未就耳四十九年君勿負蓋

棺餘恨未成翁

忘年交誼許忘形君自殷殷見古情看竹欵門纔一宿

去秋余自黔歸充宗同主一敬之見過一宿而別篝燈襪被每孤城充宗下榻海昌每入

城未嘗不快對也無端泪落期難續前一日人遠書來有與如

此人亡夢亦驚回首師門誰領袖慈湖風月可憐生

宿黎洲夫子武林寓舍即次先生丙辰九日同

遊舊韵二首

湖山憔悴哭新阡

謂萬充宗

何意蕭齋榻許連燈火夜長楓

葉雨杖藜秋老菊花天孤踪汗漫三年外萬事荒唐一

笑前話到昆明殘劫罷又緣久別却凄然

徑路先須辨陌阡眼中榛莽正鈎連肯携芸蠹隨書局  
任放醯鷄覆甕天出處心情三聘後滄桑人物兩朝前  
先生高臥貧何礙流俗知音恐未然

### 富春道中

烏柏林中霜撒華千樹萬樹圍村家門前紅葉掃還落  
白子著枝如白花寒雅成群啄不盡幾處飛出聲啞啞  
荒灣敗葦江忽轉鴈陣欲落整復斜青山正缺天一面  
澹入無迹雲拖沙十年夢想富春渚拍點圖畫空嗟呀

豈知去家纔百里足所未到如天涯人情貴遠每忽近  
往往耳目遺煙霞他年卜居恐未穩此際覓句差堪誇  
江山秀絕客懷俗母使擾擾同魚蝦

### 雨過桐廬

江勢西來灣復灣乍驚風物異鄉關百家小聚還成縣  
三面無城却倚山帆影依依楓葉外灘聲汨汨碓牀間  
雨簑烟笠嚴陵近慚媿清流照客顏

### 睦州

過城灘更急直下匯分流樹色銜雙堦山形豁一州  
烟濃傍塢樵逕細通舟風日晴尤好初冬似晚秋

### 泊茶園

危樓高百尺水落岸如山村市尚開店檣燈別占灣喜  
無塵點髻那用酒熏顏漁笛能相就飄飄壓浪還

淳安謁海忠介祠

桐鄉遺愛在民自不忘公一邑清名著三朝直節同衣  
冠瞻古貌俎豆感村翁此日流離意誰憐在野鴻

青溪口號八首

裊裊荇帶風疎疎浪花雨吳客過淳安遙人少鄉語  
隔水聞語聲空中應來肖行到響山潭人人發清嘯  
溪女不畫眉愛聽畫眉鳥夾岸一聲啼曉山青未了  
來船桅竿高去船櫓聲好上水厭灘多下水惜灘少  
家住溪東西共飲門前水對面不聞聲長灘響十里

長灘在界  
口司上

漁家小女見郎嬌不避日莫並舟歸鷓鴣方晒翅  
橋壞窄繫繩水淺牛可跨牛背渡溪人須看綠如畫  
屯溪船上客前度去裝茶娶得東村婦經年一到家

威平鎮舊名青溪洞韓蘄王擒方臘處

舊日青溪洞英雄一戰歸江關留故壘草木震餘威路  
僻烽烟靜時平盜賊稀悲笳吹薄莫峭僻冷斜暉

入歙州界

青山寒更高白日冬易暮蓬腳影初斜濛濛入烟霧  
鮎魚口中流一山俗名小普陀絕頂佛閣頗盡  
結攬之勝

神山海外絕經過此地名傳小普陀兩岸樓臺疑蜃氣  
中流日月隘鰲波桑田有劫終成幻松頂盤空老作窩  
我是游人憐偶到鐘聲回首夕陽多

從屯溪坐竹筏至休寧縣

江路西來盡輕裝稱竹舩人家新屋宇村落好山川沙  
塌魚跳岸蘆荒鴈下田怕談兵火事猶記八年前

遊休寧城南落石臺

一片蒼雲護無端隨碧空離奇存石性刻畫憎人功

刻石多  
俚鄙語

只有朝陽到偏宜曲水通峭寒難久住酒醒忽

西風

過齊雲山麓

亂峰尊白嶽一水接青溪雲自香爐出天盤石磴低勝  
游憑指顧倦路失攀躋游子匆匆意征途只向西

晚至漁亭

小步聞名好到來頗覺煩鈴聲驢背米簾戶水窮村旅  
食豐年便方言晚市喧黃茅山百折此路指祁門

祁門

二水走江湖下流極濶翻濫觴不盈尺小縣同發源一  
支下錢唐余家東海壘直從朝宗處溯洄到山根西流  
入鄱陽鯨口訝然吞飄飄孤帆色帶雨辭烟屯水流自  
相背客意難並論五丁誰能駟頑石劃輿坤鏟除恐不  
勝徒費斧鑿痕浩浩江湖流一道疾於奔關梁近增稅

亦如石塞津寧觸石磯怒莫逢關吏嗔君看商賈路辛  
苦趨祁門

發猴潭出倒湖

石惡狀爭變波喧勢就低小舟輕畏路百折下危溪雪  
意雅先覺寒光霧易迷似聞魚米賤已過浙江西

浮梁縣

苦霧吞江去茫茫出遠津長程催短晷白骨散青燐城  
小初經亂民愚久疾貧琵琶臨老妓容易嫁商人

景德鎮觀御窑瓷器歌

浮梁縣西開畫棟御廠燒瓷供輦送江天漠漠生黑雲  
百竈烟浮日光動初看兩眼炫青紅夜入孤舟夢龍鳳

文成璀璨羽毛活勢健開張牙爪弄畫彩新添寶石础  
異光欲走黃金汞頗聞中使出二年十斛缸成選難中  
至尊服御崇節儉珍錯屢却選方貢即看嗜好非異物  
器象雖精本日用同時玉瓚注黃流古玩金魚配清供  
君不見宣成嘉萬舊官窯散落民間價自高博古圖成  
曾進御猶容欵識倣前朝

登饒州鄱陽樓八韵

東北山根削西南地軸摧豫章帆不斷彭蠡鴈初迴再  
見孤城闢翻憐往日災江湖銷戰伐荆棘妬亭臺旅望  
天邊豁雄心亂後灰殺霜冬旭暖釀雪曉雲開欲去猶  
延竚無聊柰獨來未除豪氣盡飄蕩媿詩才

曉渡鄱陽湖

三更我夢滕王閣東北風高響簷鐸覺來舟子已開篷  
澹月微痕天一角須臾湖面過如飛霜氣撲船人攬衣  
蒼茫烟霧來時路水底紅輪吐半規也知此景殊不惡  
失意翻令感牢落少文四壁有江山何苦年年事飄泊  
送又微姪自豫章東歸兼示德尹

垂老雙親驗鬢絲薄游仍欠草堂賢關河最左勞人計  
猿鶴能寬閉戶期落拓生涯吾自笑滯留情事爾應知  
從教物論分優劣點檢初心也旋疑

錢玉友自嶺南來

萬里歸裝一葉身何緣相見即相親世無元九知音少

客到東方自譽頻南北弟兄愁急雪關山踪跡悔勞薪  
權輿殂落皆天意羽獵賦萬物權輿於內殂落於外眼底休輕我輩人

玉友別後寄詩二首次韻奉答

會合洵有緣此會乃絕竒數言甫投分鼓勵兼箝錘同  
調世少人高論宜卑之平生喜聞過指摘真吾師啟我  
腹筭草當君囊中錐刺骨實中病苦口俄含飴自笑狂  
奴狂况抱癡叔癡來詩內一首示聲山者故及之全身受針砭豈獨論  
文詞勉強學新粧未必盛副筭沈吟攬古鏡又恐嗤違  
時

浪游無近遠同作風塵面相顧眼雙青相期心一片勿  
嫌去住乖各要眠食健布颿冰雪候風色五更戰青燈



豫章城幾夜猶夢見書來感深愛金石矢不變因君激  
壯志鍛羽敢辭倦來書期余同  
作都門之行

杜肇余侍郎巡海閩粵故人嚴子愿在其幕中

道出南昌詩以贈別

短裘夜犯章江雪快馬嘶風三十驛梅花催促使臣鞍  
楊柳春旂看一色平生未識侍郎面才子翩翩杜陵客  
與君昔別年月深約畧歲書更六七余行絕徼偶生還  
舌在遙人那堪說半生出處禍亂定萬事蹉跎謀算拙  
喜聞田橫出海島旋見盧循免羈縶昔之滄海今桑田  
萬戶春耕破甌脫如君此去真壯遊幕府從容借籌畫  
乾坤昇平我何樂差勝危彊事行役敝廬家世東海濱

禁網佃漁寬水國遲爾同歸作飽餐巨魚雪點吳鹽白

時初開  
海禁

喜陳允文自故鄉至

十日春風釋硯冰客邊詩句擬催徵愛題僧舍紗籠壁  
恨事江城雪打燈壓擔書兼行李重飄蓬感為故人增  
西山晴色差堪望高閣何因載酒登

題聲山姪仗劍擁書圖

君不聞王喬厭世方盛年飄飄笙鶴緱山巔神仙尚須  
致身蚤何況富貴如流泉爾生負竒學書劍三十頭顱  
行可見毛錐秃穎刀善藏毋乃多才累窮賤竭來汗漫  
事遠游劍首一映徧九州下澤車中羞識面跼蹐豈必

皆封侯歸來勸游凡幾日好酒好書兼好色明朝一笈  
又出門惘惘都非可憐別時清氣壯驕不得依舊收身  
弄文墨有田不耕男已長無米能炊婦非拙何緣此日  
遂支靡難免他年聊捉鼻柳條風軟記騎馬木榻香清  
夢調瑟余亦東西南北人圖中光景增太息

元宵前一夕家觀察伯署齋小集次允文原韵

以下  
甲子

又作春燈宴他鄉共此筵盤分柑味美

時有以四會  
柑相餉者

月

傍燭花妍故態逢人發新愁被酒捐南州有懸榻我醉  
且同眠

與劉北海

君與令季太史俱先大  
父門下士故篇中及之

我降庚寅月建午襦祿含飴及見祖升沈未定矩矱移  
荏冉今年三十五客塵南北浪奔走家學淵源迷步武  
先子音容漸藐茫典型何處追王父小時猶記竊餘論  
文集諸劉指堪數翰林風度杳莫即伯仲聲華憶明府  
布帆夜下十八灘幾日春風到南浦頗聞人頌神明宰  
章貢循聲比卓魯劉時宰  
贛縣一城烟樹起樓臺千里關河  
靜鞞鼓官閒往往飛見出緱嶺軒軒見霞舉此時我作  
豫章遊却恠知名緣獨沮即論世講屬前輩小子投謁  
固其所懷中一刺署姓名雙屐逡巡阻春雨先生忘年  
復忘分先枉高軒訪羈旅下車相揖亦有人此事今亡  
乃聞古修名不立行可媿半臂重交義奚取謂余當有

祖父風不料頭顱尚如許長身三世求形似母乃遽戚  
嗟仰俯入門一笑想欲狂注目含情兩無語

章江舟次送李斯年赴湖南幕府二首

同學紛紛起布衣文章聲價剩珠璣怪來五十高常侍  
猶自隨人側翅飛

瀟湘歸櫂我匆匆重到如君又不同若對亂前談亂後  
不知誰識李元忠

楚黃陶忠毅公以世胄協守寧前衛癸未城陷

公殉節焉事具合肥宗伯行略其冢子上辛出  
公畫像索題用舊韵

已陷金城破玉門瓜沙河渭總啼痕捐軀幾輩曾當局

抵掌何人不大言五代鐵鎗傳畫像百年江月醉清尊  
李家降表尋常事話到書生惱夢魂

黃泥山村看桃同錢道耕倪上韓家兄子敬南

城友日姪聲山

春洲雲煖烟濛濛天勢四垂濃靄中一望千櫓萬櫓外  
綠楊芳草交青葱沿洄曲岸行數里小艇閣沙水忽窮  
捨舟聯袂赴村落勝境引入桃花叢迷離景光耀平野  
爛熳高燄燒晴空穠華似慳微雨著繁華欲拆朝陽烘  
居民補綴好圖畫屋茅籬竹家家同沙灣汀滢限南北  
徑路曲折迷西東老人衣冠稱古貌往往負戴隨兒童  
隔花姹媪自呼伴笑語已斷迎迴風牛羊未歸隘巷靜

荷葉堂詩集卷四  
三  
雞犬亂走柴門通武陵光景在人世但患放棹無漁翁  
兩頭絃管百壺酒醉夢一醒風塵胸江村草堂我亦有  
頗笑此景他鄉逢韶華經眼况偶到有意留戀終匆匆  
章江夕陽催晚渡水面回看紅雲紅

新柳詞和允文二首

輕烟和雨着梢頭萬縷千條作態柔落得游人春興懶  
遠遮鄉路近遮樓

桃花輕浪過花朝溪女提魚渡板橋一種紅腮多貫柳  
阿誰先挽最長條

次韵酬別聲山姪

讀書恨不搜大酉結客每慚稱小友命窮共落磨蝎宮

木偶尋常嘲土偶身輕勸翼尚江湖力困常鱗等淵藪  
蚤知去住兩牢落曷不杜門乃奔走章江二月春風顛  
橫管孤吹折楊柳愁來襍被思決去貧戀家居恐難久  
青燈聽雨且鳴雞白眼看雲又蒼狗醉眠夜夜長加股  
欲出朝朝還被肘行裝偶到急雪前歸棹纔移禁烟後  
有生光景爾許過懷抱逢人詎堪剖酒尊一澆壘塊空  
如剖魚鱉去乙丑山妻不須視儀舌俗子合訝哆衍口  
子今高堂况白髮好去稱觴酌大斗天倫樂事古所難  
鬱鬱猶能居此否

疊前韵訓別友日兄

弟生庚寅兄乙酉五歲肩隨稱棣友兒時嬉戲失同群

稍長衣冠就參偶雞豚近局接南北烟火深村望林藪  
余游故知生理拙君亦何爲轉蓬走夜雨燈挑江上花  
春風夢繞門前柳男兒有懷莽未遂樓拍半生時已久  
未能扣角事騎牛抑且埋名作屠狗不爾合甘原憲分  
鶉結從渠見襟肘誰令志氣自摧頽漫著征衣隨短後  
君平季主世少人眼底升沈向誰剖頭盤叫噪抒狂憤  
笑聽更籌移子丑忽然顧影還自憐氣塞神傷箝在口  
豈應美好長貧賤定有光芒射牛斗勸君自信當益堅  
適野不須謀可否

三疊前韵留別恭庵兄

黃雞白日移卯酉失學無端負師友名微自甘時所棄

命隻敢嗟吾不偶

出李廣傳注

惟兄諒我謂我真野鳥心終

戀郊藪君家如圃大可憶甃石開池煩下走竭來搔首  
動鄉思想像春天好花柳阿翁官高諸子秀世業平泉  
必長久余也先疇漸拋棄熊虎何當子命狗從教久瘦  
帶寬圍遑問長貧衣露肘低顏分出古人下尚冀鞭羊  
視其後愛君玉樹臨風前老蚌明珠一雙剖杜陵兩男  
養無益少長何堪集癸丑八百桑株十具牛經營無物  
貽黃口願君綵衣侍歸駕莫謾折腰爲五斗某丘某水  
記釣遊許我題詩草堂否

四疊前韵訓別允文

與君訂交從已酉鄉社無多推益友文瀾一篇論警策

詩格千言誇對偶白眉三馬人所畏

北史馬子廉兄弟三人皆能文時有

三馬皆白眉之譽

昆友聯翩出才藪余時懷槩初出遊未免籍

湜汗且走蘭茗翡翠爭秀句何異飄風嫋垂柳登塲鹵

莽拙用長堅壁逡巡困持久契舟已往莫求劍畫虎雖

成終類狗君今落筆更老成斂手薑芽看運肘但思上

第慙眼前肯顧虛名計身後精金百鍊行自惜璞玉一

圭猶待剖丁年行笈記癸辛甲族科名豔丁丑

謂允文從祖素

菴相未能飽飯便汝腹也學饑驅餬我口客中告別別

倍難濁酒直須傾一斗暫留幾日辦歸裝長說倦遊今

果否

同聲山姪過羅飯牛禮洲草堂別後賦寄用昌

黎寄盧仝韵

先生老向塵埃裏有志竟成高蹈矣衣冠已與世人同

猶自芒鞋高屐齒竹溪

羅舊居地名

茶園寬十畝春雨分膏

給妻子清風七椀生冠石

寧都冠石茶出飯牛手製者品在顧渚上

絕跡杜

門凡二紀買山定有賣山人窮乃辭鄉奚足恥舊莊唱

和傳裴迪亂國流離傷董祀巢由逃世事果難身未出

山名滿耳一聲長嘯落天半散作雲烟隨處士都無猿

鶴愧林巒絕少鷄豚餽鄰里獨携筆墨與人際堅臥有

時呼不起南州懸榻尋常下小技似可供驅使彼皆金

夫勢力求未許感恩况知己豈惟落筆不輕易立品潔

身從此始淨明菴主石田翁前輩風期看未已半生衣

食天故吝稍稍芻薪給驟駢硯田一片歲有秋食力聊  
用代耘耔先生猶云吾負疚懶惰無端釋良耜故人往  
赴河陽幕本不希心榮膺仕先生療貧策又竒獨往孤  
行竟誰恃禮洲草堂地清絕見說賃春連圯址易堂人  
物近無多把臂此來君準擬萍踪怪底成相左雨雪殘  
冬悵無似朝朝江口望歸帆百日奚童甕生趾春深沙  
渚停烟榜有客忽傳君至止廿年馳想結深企欲致高  
人我何以急呼阿咸嶺徑造門渴馬奔泉勢難俟先生  
應門無五尺反鎖柴荆入村市歸來蕭寺忽相逢一臂  
初交乃狂喜招呼雙屐過江閣草草杯槃有真理乞君  
畫稿幸不辭謂我頗可尋涯埃斯人不因筆墨重獨行  
自足傳野史即從畫品論高下清矯寧讓營丘李我詩  
不工何足酬別後空慚寄雙鯉

芙蓉庵水亭

徑轉春陰午未移小亭如蓋俯漣漪柳邊風到鱗鱗活  
鏡裏欄開面面宜欲去興狂呼酒伴重來緣淺看花時  
此間著我真塵俗何用多留疥壁詩

清明風雨舟發南昌允文聲山追送於江干更  
以數言留別

竹鷄啼苦催清明滕王閣前春水生西山高入雲霧裏  
雨勢下壓洪州城桃花杏花半狼籍岸柳自拂孤舟輕  
連朝有約同買棹二子未果余徑行雲山欣欣赴歸路

烟樹漠漠愁離程布帆風急不肯住到家正及聽新鶯

康郎山功臣廟十四韻

疇昔驅除會英雄想像間驛移青雀舫酒灑白茅灣鷹  
隼搏空擊鯨鯢授首還波濤經虎尾矢石避龍顏一戰  
西南定群公策力閒死方開國運生不點朝班紀信無  
遺恨曹成本世官顯榮褒後裔茅土愴重頒奕葉將軍  
樹廟前古槐相傳明太祖破偽漢時封為將軍中流砥柱山炎風焚鐵券石  
馬嚼金環黃屋今無跡朱旗閃尚殷太平何事業要害  
此江關廟貌瞻嚴肅時情易險艱興亡他日事清泪獨  
潺潺

餘干道中

新烟幾點散晴霞遠岸殘桃晒網家莎草一汀長帶鷺  
湖田二月已鳴蛙葱葱曉日銜山秀裊裊春風赴柳斜  
自咲薄遊緣底事漲痕空記去年沙

昌江竹枝詞八首

浮梁縣西山漸平浮梁縣東水更清濛濛天氣長如雨  
臥聽前灣水碓聲

蘘石硠硠轉轆轤春砂淘碓有精粗年來御厰添密戶  
不種山田另起租

樓閣葉瘦芭蕉肥菜花半開桃李稀背山園圃蜜蜂出  
近水人家燕子飛

穀雨前頭茶事新提筐少女摘來勻長成嫁作隣家婦



勝似風波盪槩人

船頭船尾不多高  
盡日爭先走怒濤  
博得夜來春睡熟  
一篷烟雨半枝篙

小兒灘頭水沒磯  
幾點雨著行人衣  
草煙迎岸翠撲撲  
牧笛未歸鵝鴨歸

一繩飛界兩山頭  
積石排椿抵截流  
驚起野鷗鷓箇個  
五更風浪網初收

村殺山家唱四時  
本鄉歌好少人知  
愛他曲水如巴字  
別與新詞譜竹枝

齊雲山六絕句

仄徑丹梯萬仞懸  
石楠擁蓋不知年  
不因鐵笛吹山裂

那得游人到洞天

右天門

雨織龍梭香作涎  
四時不斷吐飛泉  
藕絲簾子玲瓏影  
捲起晴雲別有天

右水簾洞

兩峰獅象對崢嶸  
鐘鼓聲中玉座清  
夜夜河魁瞻北關  
羽衣天半坐吹笙

右真武殿

禹鼎神姦散九州  
誰教一柱峙丹丘  
白雲已鎖塵寰斷  
還有香烟在上頭

右香爐峰

急歸悔不上匡廬  
辜負峰南大小孤  
恠事此來仍滿願  
已看五老又三姑

右五老三姑峰

輕身直上挾天風  
雨外天都望或封  
安得近南長見日  
與排三十六芙蓉

右紫霄崖

武林寓樓與德尹夜話

迎面蛛絲落幾番每從遠信報平安各驚顏狀他鄉換  
一落江湖戢影難犴鳥蠻花天萬里朔雲邊雪路千盤  
六年踪跡連牀話大似羗村夢夜闌

立夏前三日集汪寓昭願學堂兼留別姚天寰

顧九恒沈昭嗣陳廣陵章豈績馮文子嚴定隅

及家德尹時余將入燕二首

一櫂江城又隔年春雲春樹記尊前故鄉樂事留高會  
獨客關心奈別筵興罷艷歌重按拍酒闌孤月正當天  
年來事事輸人後齒序慚居六子先同會十人余齒在第四  
綠酒紅燈促坐深無多同調况知音琢磨頗望成全璧

激烈何須到碎琴起舞自憐中夜影急觴難緩此時心  
軟塵十丈騎驢去怕被人傳倚樹吟出莊子注

西水讌集留別姚夢虹宋受谷張王士張介山

邵翼雲金子由吳震一卓次厚九如

南路風濤北路塵歸艤纔泊復征輪三秋斷梗如遊跡  
一座清風抵故人壁壘降旗文戰罷乾坤攬轡客懷新  
天涯珍重臨岐意只有貧交不諱貧

敬業堂詩集卷四

敬業堂詩集卷五

海寧 查慎行 悔餘

踰淮集

起甲子四月盡一年

甲子夏遊學京師始渡淮而北客有賦涉淮以壯  
余行色者敬謝之曰君不聞橘踰淮且化為枳乎  
余方虞余之失其橘性而與枳為類也

歸自江右隨有燕山之行示別家人

南北勞勞但可嗤流光瞥過少年時祇緣累世留門戶  
那得此生無別離斗酒且禁連夕醉長箋難和送春詞  
勿論向後愁深淺已覺燈前鬢有絲

錫山舟次遇外舅陸射山先生自淮南歸

落帆當淑浦曲岸轉擊音已感骨肉語兼傷去住心斷  
雲晴出岫老鶴暮歸林莫作俱飄泊翁今白髮深

過二瞻兄維揚寓齋兄有贈行詩次韻酬別

征衫初換且停橈一日江程兩信潮欲去郵亭塵滾滾  
乍來岐路馬蕭蕭詩文價定人爭購書畫船輕客待邀  
劈紙風流看好在綠楊回首記紅橋

雨發宿遷

苦被林鳩喚雨多北風獵獵渡黃河不辭滑路衝泥去  
且免驚沙刮面過一騎鱗魚仍入貢十年瓠子尚聞歌  
饑荒接壤人方說愁見城南豕涉波

郊城道中

蹇驢三四驛平野入飛沙白日孤城閉清沂一道斜井  
疆郊子國風物魯人家漸與淮南異村村枳棘花

沂州送錢玉友往新城

又作殊方別春衫客泪收但須眠食健莫話短長愁鄉  
夢經蠶月人情望麥秋黃雲天四合何處辨青州

伴城旅店次徐子大壁間韻

淺草平陂極望通客程漸入亂山中坐消髀肉全無爲  
貧檢詩囊幸未空沙磧涼生蕎麥雨茅檐香過棗花風  
却愁長日行難到又拍斜陽一抹紅

齊河

關城餘霸氣雞犬入齊風山豁平沙外天低小縣東魚

鹽知俗古豚酒祝年豐別有雄繁意休誇管晏功

晚抵晏城次壁間韻

目力窮邊酒旆生熟梅天愛偶然晴高樓吹角風無賴  
壞壁留詩客有情紅日忽沈烟起處白楊長遞雨來聲  
萬山回首如屏障一片平蕪接晏城

渡蘆溝橋

草草漁梁枕水邊石湖詩裏想當年誰教甃石通南北  
鐵軸銀蹄一例穿

金史章宗明昌元年始建蘆溝石橋

京師中元詞二首

萬柄紅燈裹綠紗亭亭輕蓋受風斜滿城荷葉高錢價  
不數中原洗手花

銅盤小拍坐張燈手拍城東滿月升從此夜遊涼似水  
漸無人賣擔頭冰

憫農詩和朱恒齋比部

豳風本王業稼穡知艱難立政務明農化理自古然我  
從田間來疾苦粗能言請陳東南事約略得其端初冬  
下菽麥深溝及春前根株載培護益使土力堅麥黃未  
及秋晚蠶又催眠祈晴三四月雨水翻連綿針水分稻  
秧襖襖行耨田時方仰膏雨杲杲恒當天炎威一熏灼  
泥淖同熬煎委身沸湯中辛苦少所便好風槐柳下欲  
往不暫閒老穉亦靡寧桔槔遠吸川或防霧損花又恐  
蟲傷根半年壟畝畔力竭心亦殫如此冀西成食報理

或存但令畝一鍾歲事幸告竣私租入富室公稅輸縣  
官所餘尚無幾未足償勤拳况逢水旱加徃徃多顛連  
逃亡等無地芻牧肯見憐高位有仁人垂聽宜惻焉所  
以古大臣農事恒倦倦流移進圖繪咨傲陳風愆有時  
亟施賑詔旨輒擅專有時撫瘡痍逋賦請悉蠲不上封  
禪書不獻羽獵篇乾坤生生機君相揅微權一念苟憫  
卹惠風自遐宣矧今天子聖綏邦必豐年

將有西山之遊次謝方山員外見貽原韻

勞生莽莽嘆塵機又向燕臺換袂衣出郭人如秋澹蕩  
入山天愛雨霏微閒拖竹杖尋詩瘦賤買村醪覓伴稀  
羸得謝家新句好澹忘隨處領清暉

松林寺

含烟含露一桷桷花果禪扉鎖合牢野鳥不知園有禁  
隔牆啣出紫蒲桃

晚抵退谷與大司空朱右君先生露坐啜泉

晚色秋光帶遠坳眼明初喜見涼螢泱流噴石渾疑雨  
老樹交陰合有亭照影豈能忘盥漱出山誰復辨清冷  
閒僧尚記曾來客一縷茶烟話酒醒

公不到西山二十八年矣老僧猶能

說舊遊時事

宿隆教寺僧房

最愛堦墀細雨中瓦盆高下列芳叢白花紅子皆秋意  
斟酌西窗一夜風

從水盡頭步上五花寺閣

數折溪橋接水源亂鴉高樹又村前路危礧阻千重石  
山偏窗開一面天佛界偶來宜白晝帝城難辨是蒼烟  
留詩莫作匆匆去勝境吾將借榻眠

臥佛寺

古寺無僧佛倚墻臥聽蝙蝠掠空廊晚來光景尤蕭瑟  
葉葉西風戰白楊

金章宗手植松在壽安山西嶺上

壽安山頭一老松從下仰視青童羽衣仙人擁蓋立  
柄短却作偃僂容我思躡屩苦無伴范老性華興到許  
我從婆娑初自枝亞入中乃可置一畝宮四傍四枝分

四面側理橫出交蓬鬆東西南北不相顧意到各自成  
虬龍中間大枝裝挈領高勢一攬收羣雄其旁峭壁截  
牙角直下千尺方藏鋒蒼髯翠尾掉空際蜿蜒飲澗天  
投虹千山萬山似搖動鱗甲未斂雲濛濛須臾夕陽轉  
西麓脇下叟叟生微風一聲老鶴忽飛出竽籟散入隣  
菴鐘老僧指似時代古手植傳自金章宗是時朔南罷  
兵革貢使一一舟車通明昌泰和號極治擊球詐馬習  
俗同近郊亭館恣遊宴逐獸不入深榛叢遺山野史有  
深意國亡事去忍更攻孤臣飲泣記舊恨尙畏後世譏  
不公洗粧樓空春月白射柳圃廢秋花紅一朝故物獨  
留此鬱鬱幸自蟠蒼穹爾來四百四十載坐閱桑海如

飄蓬輪困差堪伍社櫟瀟灑猶足驕秦封君不見報國  
門前數株樹托根悔落塵埃中

碧雲寺後一山皆內監葬域中有豐碑二統刻  
魏忠賢里居官爵甚詳守僧云忠賢自爲生壙  
本朝初年忠賢名下葬其衣冠於此恨無有力  
者培其石也

碧雲臺殿倚雲端香火幡幢屬內官一代賢奸青史定  
兩朝黨籍白碑殘松杉暮雨鴉音革羊馬秋風石骨寒  
却咲山靈無藉在猶容廁鬼瘞衣冠

冒雨至香山晚宿來青軒

曲磴初從鳥道攀短牆東面抱灣環九重城闕微茫外

一氣風雲吐納間暝色浮鐘來別寺秋聲分雨過前山  
紅塵那許高千尺任放層軒擁翠鬟

同吳六皆陳叔毅湯西厓宿摩訶菴

禪榻吹燈睡不成棲鳥枝上已三更紙窗一面朦朧月  
只道秋聲是雨聲

白鸚鵡次魏環極先生原韻

古有雕籠戒今看負質竒縞衣窗外月白雪隴頭枝太  
潔從人忌能言被俗疑商山留羽翼皓首托風期

陰高漠漠是爾入林期  
之句蓋公歸志已決矣

原詩  
有秋

重陽前六日同翁元音彭椒崑錢玉友朱遠度  
吳六皆陳允大叔毅沈客子湯西崖談未菴家



荆州聲山小集分韻

青袍紅燭影相銜  
劈紙心情故不凡  
柿葉庭空聞朔雁  
蘆花水淺夢南帆  
探驪有客曾驚座  
歸燕無詩亦畏讒  
開口勿輕談世事  
尊前除飲便須緘

過顧培園編修新寓

不遣輕塵點鬢華  
斯人直比玉無瑕  
蜘蛛屋角垂垂露  
蟋蟀堦除艷艷花  
半枕茶烟清畫閣  
一窗香篆煖文紗  
從今唱和貪多暇  
底用題詩苦憶家

九日讌朱大司空花莊次韻

漠漠秋蕪一望開  
驚心節物帝城隈  
閒招南國騎驢客  
來上西風戲馬臺  
人與黃花同白社  
鳥隨紅葉下蒼苔

六年此度天南北

巳未在荊州  
庚申在銅仁  
辛酉在惻  
貴陽  
壬戌在蕪湖  
癸亥在西湖

悵名園又舉杯

送六皆歸杭並寄章豈績馮文子嚴定隅二首

風急馳鳴沙外村  
蓬蓬何意復歸根  
多時白髮思遊子  
依舊青衫出國門  
光範三書原失策  
涓城一曲最銷魂  
買田只合山莊住  
珍重天涯贈別言

黃葉黃花媚晚晴  
酒旗茅店一程程  
稍嫌歷鬢邊沙重  
不礙衝寒布被輕  
夢短賸留他夜話  
計偕稀上故人名  
得歸我亦抽鞭去  
忍向桑乾聽雁聲

嚴矐菴侍御招同惠研溪吳天章王咸中王孟  
穀朱西峻喬無功陳叔毅湯西崖小集即席分

賦

相逢塵埃中交臂面不熟雅人著懷抱有如瞳在目侍  
御鄉國賢未見意久屬司閹戒勿拒徑造少躑躅一月  
三過從看到秋殘菊長安多讌會熱客後先續長揖容  
吾曹情深感君獨紅豆致蕭淡河東才屈曲石陽光走  
珠漢陽璞藏玉髯陳好儀表大喬絕谿谷小朱及瘦湯  
秀發秋眉綠廁我數子間傭保坐擊筑淋漓取盡興豪  
爽一破俗逃觴或竟去下榻或信宿戲具雜博簞古音  
披簡牘狂言醒不禁好句互傳讀坐令布衣交放誕惟  
所欲甘從平原遊不學步兵哭吾生莽無涯疲甕信兩  
足玉川洛城居并少數間屋未能逃空虛時復累口腹

所嗟才地劣徑路故窄越諸君湖海士相轉適如輻倘  
不鄙迂疎前期幸交勗

與研谿別後疊前韻寄之

我從湯子交耳君名已熟初來長安城欲見塵眯目名  
園一杯酒邂逅情未屬

余識研溪於趙  
恒夫農部席上

別時蓮蕊紅懷

刺久躑躅忽忽秋向老花期過黃菊晚赴嚴公招名流  
趾相續森然授几席後至惟爾獨衆中造膝談稍稍致  
欸曲湯言不我欺伊人果如玉似從坡陀遊迤邐入崖  
谷松篁幽徑轉照我鬚髮綠石潤斂雲霞泉清作琴筑  
對之浮氣盡吸取藥吾俗曲尺移木床醉留同一宿男  
兒屬有才未了三千牘買田歸可種買書行可讀委身

倦仰中初念固不欲况當搖落候有痛忍輕哭涼燈一  
穗花夜半開未足浙瀝風洒窗淋浪雨鳴屋明朝門外  
路泥淖驢沒腹連鞍共君出寸步苦局趄紛紛疾走兒  
馬騁車脫輻即此慎所之久要互相勗

汪東川宮贊屬題秋林讀書圖時汪給假將歸  
似曾依樣買林臯只愛攤書不蓋茅榦老從添鴉點葉  
影疎初見鵲成巢好風開卷聲相遞古墨分香手借抄  
怪得先生官况懶畫中光景十年拋

送大司寇魏環極先生予告還蔚州二首

曳履星辰二十年尚書襍被故蕭然勇能自斷天難奪  
清畏人知世已傳白社竟成娛老地黃金不貯買山錢

閒雲一片秋寥廓何限風光倚杖前

嶽嶽寒松表

御書

寒松堂公臨行時  
御書賜額也

新堂歸到好懸

車身名似此真無媿進退何人綽有餘報國文章傳後

起

謂無偽  
中翰

立朝風骨想當初不因祖帳東門道太息方

頰比二疏

送陸蓬叟之井陘

不道西遊爾許難万峰高下渡桑乾亂鴉雪緊荒程暮  
叢雁天低斷角寒燕市莫尋當日伴并州且作故鄉看  
到時尺素煩馳寄及與梅花報歲闌

叔毅見示初度述懷詩有感而作

與君世好幼同里其室則邇其人遐年踰三十未識面

各被衣食驅天涯  
余顏顛顛變黑瘦  
攬鏡未免頻咨嗟  
子髯毵毵長一尺  
瀟灑亦復沾塵沙  
燕山此來忽交臂  
相視莫逆心靡他  
衝風冒雨屢相過  
朗吟狂咲聲謹譁  
行時肩從坐齒序  
愛比兄弟豈有加  
一朝顧我歛不樂  
刺眼怕看重陽花  
叔毅生辰在九月九日  
新詩一篇把似我音調  
慘裂如秋笳對之思  
苦難卒讀冰雪入口  
冷戰牙看君  
炯炯具至性母喪未  
闋衣仍麻泪痕徃徃  
在枕席臯魚  
岐路憐京華憶余浪  
跡走絕徼未夏四月初  
辭家先君  
下世纔一載面目赧汗  
逢人遮平生粗知奉禮  
教豈敢  
自外傷芸瓜至今肝腸  
抱至痛視息母乃同豚  
緞歸田  
但祈免溝壑此願易給  
原非奢天於我輩胡獨  
忍故令

具體蒙疵瑕子今襟期頗澹漠  
西溪片瓦已可賒塵埃  
洞瀕一回首便欲策蹇乘柴車  
幾時真約結隣去對門  
老樹枝槎枒

研溪索題紅豆齋詩冊二首

東田西澗勢相參此本如今恰有  
三一點丹砂非俗物

居然鼎足占江南

吳中紅豆三本一在拂水山莊一在王奉嘗東田一在青溪堂即研溪近

居也

薄遊久欠買山資齋笏初安負  
一枝但使主人長閉戶  
樹名何取號相思

題惠研谿崢嶸集次汪蛟門原韻二首

不成吟上紫薇亭翡翠琉璃并作屏  
一事比渠差較勝

自編佳句付樵青

紕繆論才本不多詩家勁敵許誰過不須綽板尊前度  
搖膝聽君喚奈何

硯齋吟吻暖生春推爾堯峰步後塵賴是老元偷格律  
知音此外斷無人

每被老元偷格律樂天語也  
蛟門舉似研谿故借作轉語

燕臺雜興次學正劉雨峯原韻十首

九關王氣鬱千秋如此風光蕩客愁東路雲垂遼海濶  
北條山勒太行收天蟠宮闕瞻螭尾地擁塵沙散馬頭  
老柳不禁吹笛意夕陽疎影傷高樓

千古荆丹事最奇誰教秦騎竟橫馳漁陽鼓動天方醉  
督亢圖窮悔已遲他日酒徒猶擊筑向來博道抵爭基

無聊尚有酣歌會不似東方但苦饑

北史流傳樂未央上都幾處關球場幕南地空聞傳箭

花外樓高見洗粧紫色蛙聲雄八族烏衣馬糞美諸王

分明裂帛湖邊月及照三朝舉國狂

十三陵古隔巖關往事低摧父老顏黃鳥哀歌經國恤

紅巾新籍點朝班金戈運啟驅除會玉匣書留想像間

斫却冬青人盡識祓恩羊虎尚斑斑

直放江湖日夜東異時黨論比狂風清流禍起名賢盡

甘露謀疎國運終一紙興亡看覆鹿千年灰劫付冥鴻

時平翻幸吾生晚不見郊原戰血紅

班馬文從一代編世家人物數華顛藏書已獻言何諱

焚藁無期客問年莫道汗青從蠹蝕好憑頭白寫蠶眠  
諸公衮衮皆才彥珍重須教信史傳

帳殿崔嵬令閬寥凱歌連歲奏鉦鏡雲深雁路朝盤馬  
雪點狐裘夜射雕都護玉門關不設將軍銅柱界重標  
職方別載魚龍國咲拍烽烟薄海銷

恩波一夕滿江湖下詔蠲租例久無忽見黥黎成感涕  
始知草野愛微軀龍舩旗鼓三江戍馬鞚雲霞五岳圖  
盡道登封儀注古秦松容易比貞符

朱門祭戟列東華金谷筵開辦咄嗟雪甕分漿唾楫拙  
霜刀剪韭妬萌芽歌喉欲斷從絃續舞袖能長聽客誇  
贏得狂生無藉在欲捻書籍問東家

百分一棹過觥舩何限關河載酒前投筆生涯經絕域  
定巢歸計失驚絃縱橫野馬群飛路跋扈風箏一綫天  
曾是征南舊賓客摩挲髀肉也潸然

冬日張園雅集同姜西溟彭椒喆顧九恒惠研  
谿錢玉友魏禹平蔣聿修王孟毅張漢瞻汪寓  
昭陳叔毅湯西厓馮文子談震方家荊州聲山

限韵

丈夫置身非廟廊便合食力勤耕桑誰教鹵莽走京洛  
去住兩策無一長天公似憐太坎壈一事獨許平生償  
招呼朋好作痛飲逸足快脫籠頭韁城南小莊如畫裏  
樹頭一扇風旗張忽從空曠入叢薄積雪寒峭屏山傷

籬根涸池受落葉窗面破紙穿斜陽圍爐坐密氣漸煖  
稍覺冬律回春光大枰蒸菜芼薑辣滿甕印酒開泥香  
蒲萄已充筵上果但見枯蔓牽隣牆初拈險韻鬥傑句  
旋徵雅令搜枯腸須臾耳熱更豪劇角逐兩兩爭低昂  
傷人却問何所樂我亦自咲狂夫狂三年隻身走万里  
絲路裊裊衝蠻鄉豈無釣藤蠻中酒名拚獨酌意緒冷淡難  
禁當翻身勇決作歸計又被饑餓驅遊裘別人騎馬我  
徒步鍛羽無分追高翔行藏眼底但如許有意排遣終  
悲涼風流見賞古不乏跌蕩慎勿矜辭章明朝定傳好  
事口拍點此地成驩場安知酒徒殢放意不欲與世衡  
鋒鋌城頭鴉啼客盡散獨立四顧神蒼茫

與張漢瞻次侯大年韻

竹垞今名家從君賞文格每逢最佳處輒爲浮大白自  
抱萬卷書羞隨五侯客養親兼一第歲月去已積變體  
爲時文頻遭按劍斥皇天老眼暗才地每相厄何妨掃  
蛾眉稍稍傳粉澤肯違靜者性彼好此不易

送少詹王阮亭先生祭告南海

祝融南都水環滙赤龍渴飲九州外扶桑日枝万丈高  
吞吐晨昏變明晦颶風磨旋鬣帆片蜚雨珠沈蛟室璣  
幻呈綵縷現蜃樓淡入蒼烟失鰲背不知靈封畫何境  
禹鼎無從辨疆界元和一老去作碑廟貌千秋遂稱最  
茫茫元氣收不盡好手何人復堪代康熙甲子 帝東

巡特遣輶車告時邁瑯邪先生啣命往嶺嶠星明指華  
蓋祠官奉幣紛趨蹌天使陳辭虔跪拜靈旗肅肅雲蓬  
蓬一氣流通百神萃向風海鳥聽鐘鼓有眼蠻人識冠  
帶時清邊徼無烽燧道遠詞臣多紀載公之文章在館  
閣每借名區發雄槩曩時蜀道今海邦盡洩光芒天不  
愛後先人物諒無幾才地彼此恒相待所傷或從遷謫  
到終恐才鋒束機械如公擁傳真壯遊直放胸期寫豪  
快豈徒榮遇際曠典已見風流壓前輩佛桑花發啼鈎  
輶幾日歸航下瀧瀨還朝快示紀行篇浩浩洪波納千  
派旁人若問陸賈衰徑尺珊瑚手親碎

題田綸霞少叅山薑詩後

得從京國數追隨真愛山薑一卷詩佳處不嫌千遍讀  
識君翻恨十年遲古人可作心相許同調無多論稍卑  
便欲借抄煩乞予手彈紅燭寫烏絲

小除夜椒嵒招同沈韓錫陳叔毅談未菴家聲  
山集王巖士樞部齋限韻

蠟燈垂燼夜厭厭寒薄重裘雪滿簾得路才華同輩少  
椒嵒刻管  
瑜集初成畏人心跡擇交嚴座中放論歸長悔醉裏題  
詩醒自嫌等是關山牢落意年年馬齒路傍添

次椒嵒寒夜書感見示原韻

多生積習未全除烏有何勞問子虛四壁燈明孤影外  
一官霜偏二毛初也知作客年年慣若論謀身種種疎



敬業堂詩集卷五  
比似無家還較勝叩門連夜得兒書

除夕飲許時菴先生寓齋二首

南衝烟瘴北風沙每到殘宵輒憶家  
土鏗光陰飛石火瓦盆消息候梅花  
百觚濁酒澆愁緩一杵疎鐘警夢餘  
草草行藏十年事寒鐙影裏又京華

小閣圍爐薄雪侵坐移宮漏夜方深  
最憐入座聞吳語轉遣思鄉動越吟  
射虎殘年留想像亡羊岐路判升沈  
對床未易論前事倚賴鳴雞激壯心

敬業堂詩集卷五



